

VASEGA LAITI 2025

MANATU AOAQ: FAALAGOLAGO I LE ATUA I TAIMI UMA

MANATU TAIALA O IANUARI – FEPUARI:

FAAMOEMOE MA FAALAGOLAGO I LE ATUA.

O le Atua o Ia o lo tatou malu i taimi faigata ma le souā o le olaga. O a foi faafitauli e tutupu ma alia’e i lo tatou soifuaga nei, o Ia lava tatou te mapu ma toomaga i ai, i le ua tatou matuai faatuatua ma le loto talitonu ia te Ia, atoa ai ma lo tatou faamoemoe ma faalagolago i lona alofa tunoa.

ASO SA: 26 IANUARI 2025 (Aso Sa Tupulaga)

MATAUPU: SATARAKA, MESAQO MA APETENIKO

SINI: Ia malamalama le vasega, o a faitaga ma fita e tutupu i lo tatou ola, e laveaiina lava i tatou e le Atua, ina ua tatou faamoemoe ma faalagolago ia te ia.

TUSI FAITAU: Tanielu 3: 16-25

FESOASOANII MO FAIAOGA:

O Sataraka, Mesako ma Apeteniko tamaiti, o tagata Sa Iutā. O ni tagata sa tumau lo latou talitonu ma lo latou faatuatua i le Atua. O ni taulelea e lē palaa’ai ma fefe vavale gofie. Auā ua latou iloa lelei, o loo faatasi le Atua ma i latou.

Le ala foi lea na latou le popole ai, ina ua fai le faaiuga a Nepukanesa le tupu o Papelonia e faaoo ai le oti ia i latou, e ala i le fusifusia o i latou ma lafoaina i le ogaumu aasa e mu ai. Peitai ua latou tali mai ia te ia ma faapea mai; “..... *afai o lea, ua mafai lo matou Atua, matou te auauna i ai, ona laveai mai ia te i matou ai le ogaumu e mu ai le afi, na te laveaiina mai lava i matou ai lau pule le tupu. A e peitai, ia silafia e oe le tupu e, matou te le auauna i ou atua; o le tupua auro foi ua e faatuina matou te le ifo i ai.*”

O upu ia na tautatala ai Sataraka, Mesako ma Apeteniko, na ita tele ai Nepukanesa. Ona fai atu lea o Nepukanesa i ana auauna, ia faaasa le ogaumu, ia faafitu ona sili i le ua masani ai ona tafuina. Ua ia faapea atu foi i tagata e sili ona totoa i ana ‘au, ina ia latou fusifusi ia i latou ma lafoaiina i le ogaumu e mu ai le afi.

Ona faapena lea ona usitai tagata nei ia Nepukanesa ma lana faatonuga, ma latou lafoina ai loa Sataraka, Mesako ma Apeteniko i totonu o le ogaumu.

Tamaiti, fai mai ua ofo Nepukanesa ma toe fesili atu i ana auauna na lafoina i latou i le ogaumu, “*pe na tatou le lafoina ea tagata e toatolu o fusifusia i totonu o le afi, ao leni ua toafa i latou o loo feofeo’ ai solo i totonu o le ogaumu e aunoa ma se afaina i le afi?*” Ae tali mai ana auauna ua faapea mai, “*Le tupu e, sa faapena lava*”

Le fanau o le aoao mai na a le tatou mataupu i lenei taeao, o fea lava tatou te i ai, ao a foi faafitauli e aafia ai lo tatou ola, ia tatou iloa ma mautinoa lelei, e faatasi mai pea le Atua e laveai ia i tatou.

GALUEGA FAATINO: Taliga Fesili

- 1) O ai Sataraka, Mesako ma Apeteniko?
 - O tagata Sa Iutā
- 2) O ai Nepukanesa?
 - O le tupu o Papelonia
- 3) Aisea na lafoaina ai Sataraka, Mesako ma Apeteniko i le ogaumu?
 - Ina ua le usitaia le faatonuga a le tupu.

PESE:


Sataraka e, Mesako ma Apeteniko
Ua iloga lo latou tala faasolopito
Tumau le faatuatua i le Atua soifua x2
E leai se alu ma to e foi i tua.

Tali: Nepukanesa e, ua le mautonu, i le mea ua tupu
Iesu ua i ai totonu o - le ogaumu.
(Fati: O ba la di)

A'OA'OGA:

1. E laveaiina i tatou e le Atua i taimi faigata.
2. Talitonu ma faatuatua i le Atua.
3. E faatasi mai pea le Atua ia i tatou i taimi uma.

SATARAKA, MESAKO MA APETENIKO



ASO SA: 2 FEPUARI 2025

MATAUPU: OLIOLI I LE ALII

SINI Ia malamalama le vasega, e tapena e le Atua mea e faafiafiaina ai i tatou,
ma
maua ai lo tatou olioli.

TUSI FAITAI: 1 Samuelu 2: 1-3

FESOASOANI MO FAIAOGA:

A faamatala le olioli taimiti, fai mai o lagona e tupu a’e i le loto o le tagata, ina ua faamalieina lona manao i le tausiga a le Atua. E aiga tutusa ma lagona o le fiafia. Lagona faafetai i le Atua, auā ua Ia faafogaina a tatou tatalo.

E faapena le mea lea na tupu i le loto o le teine o Hana. O lagona o le fiafia, lagona o le olioli, ina ua ia mautinoa, ua faafogaina ma tali mai le Atua i lana tatalo, i le fia maua o sana tama. Ae ina ua maua lana tama ona fai mai lea o Hana “ua olioli lo’u loto i le Alii, ua faamaualugaina lo’u nifo e le Alii.” O upu ia na tautala ai Hana e faailoa ai lona olioli ma lona fiafia; e le gata ua tali le Atua i lona manao, ae ua mafai foi ona faailoa i tagata, o ē na ula ma aamu ia te ia, e leai se mea e faigata i le Atua. Pe afai e tatou te alolofa ma le faamaoni ia te Ia.

Tatou mataupu lena tamaiti. Ao le a ea se aoaoga ua aoaoina mai ai tatou? Ioe tamaiti, o lea ua faamanatu mai ia i tatou, ina ia tatou iloa ona faafo’i le faafetai i le Atua, pe a ua faamanuiaina soo se faamoemoe lava sa feagai ma i tatou. O le fautuaga, ia ‘alo’alo ese tatou le fanau mai le maua o manuia, ona tatou faagalo lea o le alofa o le Atua na mafua ai ia manuia.

GALUEGA FAATINO: PASO

Saili mai upu nei i le paso o lo o i lalo.

- 1) Hana. 2) Olioli 3) Fiafia 4) Tatalo 5) Faafetai 6) Vivii

A	U	I	O	U	Y	N	G	J	J	Y	J	H	J	N	F	F	T	R	T
F	O		U	H	J	F	J	K	H	T	M	J	R	E	B	Y	Y	U	O
G	E	H	J	K	L	U	T	Y	U	I	J	K	H	I	M	H	G	L	U
H	F	Y	J	M	K	L	I	N	G	J	H	U	H	R	H	K	A	L	J
T	O	K	J	M	A	S	D	E	F	D	E	F	V	F	D	T	S	A	K
Y	L	A	C	V	X	H	A	N	A	S	E	R	F	C	A	E	V	B	L
H	I	R	E	T	B	Y	G	H	J	Y	V	B	D	C	Q	A	D	S	O
J	O	G	H	E	T	U	T	Y	Y	I	R	U	T	T	Y	R	Y	O	P
K	L	H	N	R	Y	H	Y	U	I	T	E	T	Y	U	U	T	U	P	D
I	I	J	J	W	U	F	R	V	H	Y	R	Q	G	I	I	J	J	I	F
T	I	F	K	Q	I	Y	I	T	G	H	T	A	H	G	B	H	H	L	G
R	U	B	B	A	G	V	E	A	F	U	R	S	G	J	N	N	F	K	T
Y	J	N	Y	S	H	Y	E	H	F	I	U	D	H	F	M	K	D	J	H
U	K	M	M	D	N	T	R	J	G	I	N	F	F	S	N	M	S	M	N
I	L	F	N	F	J	U	T	G	T	F	A	A	F	E	T	A	I	B	B

Uiga o Upu:

- i) Faamaualugaina lo'u nifo – faaeaina, faamanuina, siitia lona tulaga.
- ii) mau tali – iloa ona tali atu
- iii) leai foi se papa e tusa ma le Atua – e leai se malosi e tusa ma le Atua.
- iv) faaono'ono – faatiga, faifai, faatauemu

PESE:

(Fati: Eidewise)

Lou Atua e, lou Atua e,
Ou te pese ma faafetai
Ua e alofagia le faatauva
Po o ai ea le tagata.

Lou Agaga e, ia faamanū
Vivii atu ia i le tupu
Se a le tagata, ma le faatauva
U-a e manatu mai ai lava.

A'OA'OGA:

1. E faia e le Atua mea tatou te fiafia ai
2. Ua na o le Atua tataou te maua ai olioli.
3. Ia tatou maua le fiafia ma le olioli i taimi uma.

OLIOLI I LE ALII



ASO SA: 9 FEPUARI 2025

MATAUPU: E LEAI SE MEA E FAIGATA I LE ATUA.

SINI: Ia malamalama le vasega, e faigofie mea uma pe a tatou tatalo i le Atua.

TUSI FAITAU: Isaia 38: 1-5

FESOASOANI MO FAIAOGA:

A oo ina feagai tatou le fanau ma ma'i o le tino; e pei o le fulū(*flu*) poo le fiva ia pe faasuati foi; ia pe tiga foi le ulu ma pepē le tino; e lagona lo tatou vaivai ma le malosi ua alu ese malie atu. E leai foi so tatou fiafia e maua, e le lagona foi se fia 'ai; ae na o le taaotooto e pei o se tagata o le a oti.

Peitai, o le taimi tonu lena e ao ina iloa e tatou le fanau, o loo tofotofoina ai lo tatou faatuatua ma lo tatou talitonu i le Atua. O le uiga o le tala, o le taimi lena, ua tuu mai e le Atua pe tatou te iloa ona saili atu ia te Ia e ala i le tatalo.

E faapena le mea lea na tupu ia Esekia i le tala lea sa tatou faitauina. O lea ua oo mai le afioga a le Atua, e tauala mai ia Isaia. Ia fai loa sana mavaega i lona aiga, auā o le a maliu o ia.

O le taimi a lena na maua ai e Esekia lea tala faanoanoa, fai mai na fāliu o ia i le pa o lona fale ma tagi lotulotu ma fai atu i le Atua, "Le Alii e, oute aioi atu, ia e manatu mai i lo'u savali i ou luma ma le faamaoni, ma le loto atoa, ua ou faia foi mea ua e finagalo i ai."

Tamaiti, fai mai na faaofogaina e le Atua le tatalo a Esekia, ma toe faaopoopo ai isi tausaga e Sefulu ma le Lima.

O se faamanatu foi lea mo i tatou le fanau, 'aua nei galo ia te i tatou, e faia e le Atua mea tatou te mananao i ai, pe a tatou saili atu ia te ia ma le loto atoa ma le faamaoni.

Manuia tele outou le fanau.

Uiga o upu:

- i) mavaega – upu faamavae, upu mulimuli
- ii) Tagi lotulotu – tagi masusū
- iii) Perofeta – Auauna a le Atua, Faifeau

GALUEGA FAATINO: Tali Fesiili

1. O ai le perofeta na faailoa ia Esekia le mea o le a tupu ia te ia?

Tali: Isaia.

2. Na faaofogaina e le Atua le tatalo a Esekia?

Tali: Ioe.

3. E fia tausaga na toe faaopoopo e ola ai Esekia?

Tali: E 15 tausaga

PESE (Fati: Iorana e,)

Esekia Esekia Esekia e, hehe
Ta-gata loto tele
Tatalo i le Atua, le Atua soifua
Lona ola ia faasāfua.

Tali: E sefulu lima tausaga
Sefulu lima na faaopoopoina
E sefulu lima tausaga
Sefulu lima faaopoopoina.

A'OA'OGA:

1. Tatalo ma le loto talitonu i le Atua.
2. Ia finafinau i le ola tatalo.
3. O le tatalo e manuia ai se faamoemoe.

UA FAASAGA ESEKIA I LE PA O LONA FALE



ASO SA: 16 FEPUARI 2025

MATAUPU: E TALI LE ATUA I O TATOU MANAO

SINI: Ia malamalama taimi e tali le Atua i manaoga o tatou loto.

TUSI FAITAU: Luka 2: 25-32

FESOASOANI MO FAIAOGA:

O Simeona lea e ta'ua i tatou mataupu, o se tagata e amiotonu ma talitonu i le Atua. Sa ia faatalitali i le afio mai o Iesu e laveaiina Isaraelu. Na faailoa i ai e le Agaga Paia, e le mafai ona oti o ia, sei vagana ua vaai o ia ia Iesu Keriso. Ua alu ane o ia i le malumalu ma nofo ai. Ona o ane lea o matua o Iesu e ave Iesu i le malumalu faapei ona tatau i le tulafono. Na sapaia loa e Simeona le tama ona vivii ma faapea atu, "Le Alii e, e te tuuina atu nei lau auauna ia alu ma le manuia pei o lau afioga; auā ua iloa e o'u mata lau faaolataga, ua e saunia i luma o nuu uma lava; o le malamalama e faamalamalama a'i nuu ese, ma le mamalu o lou nuu o Isaraelu."

Tamaiti, o le manao na o Simeona, e fia sapaia ma vaai ia Iesu Keriso ona oti lea o ia. Ao le tāua lea o le tagata e talitonu ma faatuatua i le Atua. O le a le mea e manao i ai, e faia lava e le Atua. Faapena foi la tatou, a tatou alolofa ma faalogo i le finagalo o le Atua, o le a foi le mea tatou te mananao i ai, e faia lava e le Atua.

Ia manuia tele outou le fanau.

Uiga o Upu:

- i) Amiotonu – Amiolelei
- ii) muai – taimi muamua

GALUEGA FAATINO: Faatumu Avanoa

Faatumu avanoa i upu nei: Ierusalem, *Amiotonu, Simeona, faamafanafanaina, faatalitali.*

Faauta foi, sa i _____ le tagata e igoa ia _____; o le tagata _____ o ia ma le amioatua, sa _____ atu o ia i le _____ o Isaraelu.

PESE: Ou te le faatali sei matua.

A'OA'OGA:

1. E tali le Atua i o tatou manao
2. Fiafia ia Iesu i taimi uma.
3. Amiotonu ma faamaoni.

UA SAPAIA E SIMEONA IA IESU O LE FAAOLA



ASO SA: 23 FEPUARI 2025

MATAUPU: SOLO I LALO PA O IERISO

SINI: Ia malamalama le vasega o le solo i lalo o le pa o Ieriko, o le finagalo o le Atua.

TUSI FAITAU: Iosua 6: 20-25

FESOASOANI MO FAIAOGA:

A solo i lalo se pa tamaiti o lona uiga ua malepe pe ua leaga foi. Ae leai se pa e tu tu a solo pe leaga foi. E a la ona leaga, ona ua faaleagaina e se tagata, ia pe faaleagaina e se matagi malosi.

Peitai o le solo i lalo o le pa o Ieriko, e le o se mea na faia e le tagata, ao se mea na mafua ina ua finagalo le Atua, e faaumatia tagata nei e nonofo ai, ona o le ola tetee ma le ola le talitonu i le finagalo o le Atua. Ua ili e faitaulaga ia pu, ona alalaga lea o le nuu i le leo tele.

Tamaiti, o le taimi lava foi lena na ona solo ai lea i lalo o le pa o Ieriko, ma o ane ai lea o le nuu o Isaraelu ma latou a'ea le pa ma latou faaumatia ai lea o tagata Ieriko, o tane, o fafine, o tama ma toeaina atoa ma povi ma mamoe ma asini. O lona uiga, ua faaumatia uma le nuu.

Na fai atu lea o Iosua i tagata ia na o e asiasi le nuu, ia o atu i le fale o Raava le fafine talitane, ma au mai ia te ia faatasi ma i latou uma ua ia te ia, e faapei ona la tauto i ai. Ona o loa lea o nei taulelea ma au mai Raava ma lona aiga uma sa mau ma ia.

GALUEGA FAATINO: Tusiga ata

Faamolemole lau Susuga le faiaoga, e te tapenaina ni pepa A4 ma ni vali e faaaoga e tamaiti.

Tusi mai se ata o se pa.

PESE Solo i lalo pa o Ieriko.


A'OA'OGA:

1. E faafofoga le Atua i o tatou leo.
2. Tatou te manumalo ona o Iesu.
3. Tumau i le Atua ma le loto atoa.

UA ILI PU E ISRAELU MA FAATAAMILO I PA O IERIKO



SOLO I LALO PA O IERIKO



MANATU TAIALA O MATI: OLA AUAUNA

O le faamoemoe maualuga lea o lo tatou i ai i le feau ma le galuega a le Atua. O le ola ia iloa ona tautua ma auauna mo Ia ma lona finagalo. O so tatou potou ma so tatou malosī, ia toe faafoi lava i lē ana le ola ma le malosī, e ala i sa tatou auaunaga.

ASO SA: 2 MATI 2025

MATAUPU: MULIMULI IA IESU

SINI: Ia malamalama tamaiti e valaauina i tatou e le Alii e fai ma ona soo.

TUSI FAITAU: Luka 5: 4-11

FESOASOANI MO FAIAOGA:

O le mulimuli i le Alii tamaiti o le tagata ua filifili lona loto e auauna mo le Atua. Ua filifili e faaoga lona ola e galue ai i soo se galuega e finagalo i ai le Atua, faapei o le talaiina o le finagalo o le Atua.

Tala sa tatou faitauina, o lea ua faailoa e Simona ia Iesu, ua alu le po o latou fagogota, e leai ma se ia na maua, ae ona laga fetalaiga *“Ina tuutuu atu ia i le loloto, ma tuu ifo ai o outou upega e maua ai i I’a.”* o le a latou tuu ifo ai le upuega i lalo. Fai mai tamaiti, o ina na matuai talitonu ai loa ma Simona ina ua latou siomia se au i’ a tele lava, ma ua masae ai lo latou upega. Le ala foi lea ua latou genogeno atu ai ia i latou o i le isi vaa, e fesoasoani, ona o atu lea o ia vaa ma ua tali gogoto foi latou i le tele o I’a.

O i na talitonu ai loa ma Simona Peteru, ona faapaū lea o ia i tulivae o Iesu, ma fai atu, “Le Alii e, ina maliu ese atu ia oe ia te au, auā o a’u o le tagata agasala.” Ona fetalai atu lea o Iesu, “Aua e te fefe, e amata atu nei ona po ona e maua tagata.” O lona uiga, e amata atu i le aso nei, ona toatele tagata e mulimuli ia te outou.

Tamaiti tatou mataupu lena, o le tagata e mulimuli i le Atua, na te maua manuia e tele. Ao lē e le mulimuli i le Atua, e leai foi sana mea e maua.

Uiga o Upu:

- i) genogeno – gagana e faaoga ai mata
- ii) tāli gogoto – toeitiiti lava goto.

GALUEGA FAATINO: Taliga Fesili

1. O ai Simona Peteru?

Tali: O le soo Iesu.

2. O le a se fetalaiga a Iesu na fai ia Peteru?

Tali: Ina tuutuu atu ia i le loloto, ma tuu ifo ai o outou upega e maua ai ni i’a.

3. O ai isi fai faiva o loo ta’ua i le tusi faitau o le mataupu?

Tali: Iakopo ma Ioane.

PESE: Ou te faia outou ma fai faiva i tagata.

A'OA'OGA:

1. Faalogo ma Usitai
2. Mulimuli i ala o le Alii
3. Toaga i le lotu

MULIMULI IA IESU



ASO SA: 9 MATI 2025

MATAUPU: OLA FA'AAOGAINA

SINI: Ia malamalama tamaiti e faaaogaina e le Atua lo tatou ola i soo se feau e manuia ai.

TUSI FAITAU: Esoto 19: 3-6

FESOASOANI MO FAIAOGA:

A faaaogaina lo tatou ola e le Atua i soo se faiva ma soo se tiute, o lona uiga ua tofofi ma valaauina i tatou e faia le finagalo o le Atua. E eseese foi le faaaogaina o tatou ola e le Atua. O nisi e fai ma tausii aiga, o nisi e fai ma fomai, o faiaoga, o leoleo ia pe faifeau ma faletua foi.

E faapena foi la le finagalo o le Atua mo lona nuu o Isaraelu, ina ua o ese mai Aikupito, ma nonofo i le vao o Sinai e latalata ane i le mauga. O le mea ia iloa e tatou le fanau, o i na alu a'e ai Mose i luga o le mauga; ona valaau ane lea o le Atua ma fai atu ia Mose.

“Mose, ia e fai atu i le aiga o Iakopo ma faaali atu i le fanauga a Isaraelu, Na outou vaai atu i mea na ou faia ia Aikupito, na ou ave'a'e ia te outou ai apaau o Aeto, ma ou aumaia outou ia te au. O le mea lea, afai tou te matua faalogo mai i lo'u leo, ma tausiusi i lau feagaiga, ona ou faia lea o outou ma oloa t'aua e sili i nuu uma lava. E fai outou ma nuu o ositaulaga ma nuu paia mo a'u.”

Pau a lea o le finagalo o le Atua mo lona nuu, ia faaaogaina lo latou ola e faalogo ai i lona finagalo ma tausiusi i lana feagaiga, ona faamanuia mai ai lea o le Atua ia tei latou. O lona uiga tamaiti, o le ola ua faaaogaina e faalogo ma usitai ai i le finagalo o le Atua, e maua manuia e tele.

O le faamanatu foi na mo i tatou le fanau, o le faaaogaina o lo tatou ola tuputupu a'e mo le Atua, e faamanuia mai ai le Atua.

Ia manuia tele outou le fanau auā le feagai ai ma le ola aoaoina i lenei foi vaiata o le tausaga.

Uiga o Upu:

- i) luga o Apaau o Aeto – E faatatau i malosii ma le matautia o le Atua
- ii) Feagaiga – Maliliega
- iii) Oloa t'aua – fanau e usitai i le Atua.

GALUEGA FAATINO: Taliga Fesili

1. O ai le nuu o le Atua o ta'ua i le mataupu.
Tali: Isaraelu
2. O le a le mea na mana'o ai le Atua i lona nuu?
Tali: Ia faalogo ma tausiusi i lana feagaiga.
3. O fea na valaau ai le Atua ia Mose?
Tali: O luga o le mauga o Sinai.

PESE: Ave lou ola ia aoga.

Ave! Ave lou ola,
Ave! Ave mo le Atua
Ave! Ave lou ola,
Ave lou ola, ave lou ola,
Ave ia aoga.

Ave! Ave ou lima
Ave! Ave mo le Atua
Ave! Ave ou lima
Ave ou lima, ave ou lima
Ave ia aoga.

Ave! Ave ou vae
Ave! Ave mo le Atua
Ave! Ave ou vae
Ave ou vae, ave ou vae,
Ave ia aoga.

A'OA'OGA:

1. Ave lou ola mo le Atua.
2. E fa'aaogaina i tatou e le Atua mo lana feau.
3. Ia ava ma faalogo i le Atua.

UA VALAAU LE ATUA IA MOSE



ASO SA: 16 MATI 2025

MATAUPU: ALOFA I SO O SE TAGATA

SINI: Ia malamalama tamaiti o le alofa i soo se tagata, e auala mai ai manuia o le Atua mo i tatou.

TUSI FAITAU: Kenese 18: 1-8

FESOASOANI MO FAIAOGA:

O le alofa tamaiti o se lagona lelei ma le manaia e tupu a’e i lou loto, e mafua ai ona e faia se galuega lelei i se isi tagata. E mafai foi ona faapea o le alofa o se meaalofoa a le Atua ia te oe.

O le alofa foi lena lea e talanoa ai le tatou tusi lea sa faitauina. O le alofa o Aperaaamo i tagata e toatolu. Fai mai ua tepa a’e Aperaaamo ma iloa atu i latou, ona momoe lea faafetai’ ai ia te i latou ma ifo to’ele i ai. Ua ia fai atu foi, “Le Alii e, afai ua e alofa ina lau auauna, ‘aia e te maliu loa, ae malolo maia i lalo o le laau, sei ou aumaia sina vai e mulumulu ai o outou vae, ma sina mea’ ai e faamalosi ai o outou loto, ona outou o ai lea, auā o le mea lea ua outou o mai ai i lau auauna nei.

Ua afe ane i latou nei e tusa o le manao Aperaaamo. Ona vave atu lea o Aperaaamo ia Sara ma fai atu i ai, e faavave ona tapen a se sea o falaoa ma falaoa lelei se tolu, ia palu ma fai ai potoi areto. Ua ia faavave atu foi ma au mai le tamai povi e mu’amu’a ma le lelei, ma avatu i taulelea ia vave ona gaosi mo ana malo. Ua uma ona gaosi, ona ia laulauina lea faatasi ma le suasusu toa, ma le suasusu, ona latou aai ai lea.

Tamaiti ese le manaia o le faatinoina o le alofa o Aperaaamo a ea? Ia faapena foi la tatou, ‘aia seiloga o le tamaititi e iloa ma masani ai tatou ona faatoa alofa lea i ai. Ae ia alofa so se tasi.

Uiga o Upu

- i) sea o falaoa – O le fua o le paluga o le falaoa.
- ii) aluna o Mamere - o le igoa o le laau e ola i Mamere

GALUEGA FAATINO: Paso

Saili upu nei mai le paso o i lalo: Mu’amu’a, Aperaaamo, Alofa, Areto, Suasusu, Povi, Sara

A	F	G	B	K	H	B	F	D	E	N
D	L	R	T	Y	U	D	B	H	Y	U
R	E	O	E	S	E	R	H	U	T	I
T	F	E	F	U	T	B	N	H	E	O
A	P	E	R	A	A	M	O	J	R	L
A	H	A	S	S	T	P	O	V	I	K
E	G	E	E	U	E	E	T	U	Y	I
F	N	C	B	S	N	M	E	Y	U	F
I	H	E	E	U	E	E	R	J	J	A
O	B	E	R	T	Y	E	A	K	U	G
U	G	H	J	K	I	U	Y	R	R	A
M	U	A	M	U	A	A	D	S	A	G
F	E	T	A	U	I	O	A	V	B	S

PESE: Alofa i ou tuaoi a o e malaga

A'OA'OGA:

1. Alofa i so o se isi.
2. 'Aua le alofa faapito.
3. E alofa Iesu ia i tatou uma.

ALOFA I SOO SE TAGATA



ASO SA: 23 MATI 2025

MATAUPU: O LE PEROFETA O IEREMIA

SINI: Ia malamalama tamaiti o Ieremia o le perofeta valaauina a le Atua.

TUSI FAITAU: Ieremia 1: 4-10

FESOASOANI MO FAIAOGA:

O Ieremia tamaiti o le atalii o Hilikia le faitaulaga. O ia foi o se tasi o perofeta na valaauina ma tofia e le Atua mo lona finagalo, ao lei fanau o ia.

Fetalai le Atua, “Na ia iloa o ia ao lei i ai o ia i le manava o lona tina, na faapaiaina ao lei fanau mai, na tofia o ia e fai ma perofeta.” O lea ua iloa lelei, o Ieremia na tofia ma filifilia e le Atua, ao lei faia o ia i le mavana, e oo foi i le faapaiaina o ia.

Peitai fai mai Ieremia, “Aue, le Alii e le Atua, ou te le iloa ona tautala, auā o a’u o se tamaititi.” Talofa e, ia Ieremia, ua ia le iloa lava o le Atua lea ua fetalai atu, pau lava le mea sa tataua na ia faia, o le faalogo ma usitai, a ua fetalai loa le Atua, o le mea mautinoa lava e tupu ma taunuu.

E ui a la i lagona ia o Ieremia, ae na toe faamanino lava i ai e le Atua, ina ua fetalai le Atua, “ ‘aue e te fefe, oi latou uma ou te auina i ai oe, e te alu lava, o mea ua foi ou te fai atu ai ia te oe, e te fai atu lava. Ou te ia te oe, e laveai ia te oe.


Ona faaloaloa loa lea o le aao o le Alii ma pa’i atu i ona laugutu ma fai atu, “ua ou tuuina atu au upu i lou gutu, faatua, ua ou tofia oe i le aso nei e te pule i nuu ma malo, ete liaina ma lepetia ma faaumatia, e te faatuina foi ma totoina.

Tamaiti, o Ieremia lea pei ona ta’ua i la tatou mataupu, o se perofeta na valaauina ma tofia e le Atua, ao lei fanau mai o ia. O le faamanatu foi lea mo i tatou, ae tatou te lei fananau mai, ua leva ona i ai tofia ma valaauina eseese ua tapenaina e le Atua mo i tatou i le lumanai, pau la tatou mea e fai, o le tatolo ma usitai i le faatonuga a le Atua lea e taula mai i o tatou matua.

Uiga o Upu:

- i) Perofeta – Auauna a le Atua, Faifeau
- ii) Faapaiaina – Faauuina
- iii) Liaina – Aveeseina
- iv) Lepetia – Faaleagaina
- v) Faaloaloa – Faasa’o.

GALUEGA FAATINO: Faafetaui upu i o latou uiga.




PESE: (fati: Eleni)
Ieremia! Ieremia!
Atalii o Hilikia, ua filifilia
Pule-le Atua, lona faaaogaina... huhuhuhu
Fai ma Perofeta, ua faapaiaina... tililitilili—ti-ti-ti.

Isa-raelu sei fai fuafua,
O le perofeta na valaauiina e le Atua
Na totofi, na totofi, na totofi mai le lagi.
Faamoemoe ina ia tatou fealofani.

A’OA’OGA:

1. Na o le Atua na te silafia lo tatou faaaogaina.
2. Faamaoni i lou valaauiina.

O LE PEROFETA O IEREMIA



ASO SA: 30 MATI 2025

MATAUPU: O KAINO MA APELU

SINI Ia malamalama le vasega i le eseesea o taulaga a Kaino ma Apelu.

TUSI FAITAU: Kenese 4: 1-5

FESOASOANI MO FAIAOGA:

O Kaino ma Apelu o le fanau a Atamu ma Eva. O Kaino o le galue fanua ia ao Apelu o le fai lafu manu ia. Ua tapena nei tama e fai taulaga i le Atua. Ona o la aumaia ai lea o fua o la galuega e osi ai le taulaga a le tagata lava ia i le Atua.

Ua aumai e Kaino ia fua o le fanua, ao Apelu ua ia aumaia uluai tama a lana lafu o e pepeti ai lava e tapena ai lana taulaga i le Atua. O le mea ua tupu, ua silasila le Atua i le taulaga a Apelu, a ua ia le silasila i le taulaga a Kaino; o i la na amata ai loa ona mata faanoanoa Kaino ona ua ia manatu ane, ua le mu lana taulaga, ae leiloa pe aisea.

Tamaiti, ia o tatou pei o le tama nei o Apelu, e fiafia e foai mea lelei ma mea e silisili ona matagofie mo le Atua. E i ai nisi o tatou a tatou o mai ma sene mai matua, ae ua o mai nana le isi vaega, ae aumai na o sina vaega. Ia manatua e tatou e faamanuia le Atua i le tamaititi e foai mea lelei ma mea silisili mo Ia. E ao foi ina iloa e tatou le fanau ona ave mea lelei mo le Atua, auā e tapena e le Atua mea e aupito sili ona manaia mo i tatou.

Ia manuia tele outou le fanau.

Uiga o Upu:

- i) Kaino – Ua ou maua le tagata mai le Atua.
- ii) Faa'u'ū – mata faanoanoa

GALUEGA FAATINO: Tusiga Ata

Faamolemole lau susuga e tapena ane ni A4 pepa e tufa i tamaiti e faatino ai la latou galuega faatino e pei ona ta'ua i luga.


Tusi mai se ata o se maumaga po o se lafu manu (povi, puua, mamoe)

PESE: 158

A'OA'OGA:

- 1. Ave mea sili mo le Atua
- 2. E silasila le Atua i le taulaga e faia ma le loto atoa.

O TAULAGA A KAINO MA APELU



MANATU TAIALA O APERILA: E AUMAI E LE ATUA LE FIAFAI MA LE OLIOLI.

Ua na o le Atua e malie ai o tatou manao i mea lelei uma. O le talitonuga lea ua masani ai le au kerisiano. O le Atua na te tapenaina manuia e tele i lo tatou ola. E na te aumai foi le fiafia ma le olioli i o tatou loto.

ASO SA: **6 APERILA 2025**

MATAUPU: **O LE LOTO FAAFETAI O SAKARIA**

SINI: Ia malamalama le vasega na faafetai Sakaria i le Atua, ona ua alofagia e le Atua lo la aiga.

TUSI FAITAU: Luka 1: 76-80

FESOASOANI MO FAIAOGA:

O Sakaria ma Elisapeta tamaiti, o se tama ma se tina ua matutua lava ae lei i ai se la tama. O se ulugalii e faamaoni i le Atua, sa savavali foi i poloaiga ma tulafono a le Atua. O le ala lea na faamanuia ai le Atua ma foaina i ai le la tama.

Ao le tusi faitau o le tatou mataupu o lenei taeao, o se vaega o le loto faafetai a Sakaria i le Atua ona o Ioane le la tama. Fai mai Sakaria, *“O oe foi, le tama, e ta’ua oe o le perofeta a le Silisili ese, auā e te muamua atu i luma o le Alii e sauni i ona ala; e faailoa atu le faaolataga i lona nuu i le faamagaloina o a latou agasala, ona uma mutimutivale le alofa o lo tatou Atua, ua asiasi mai ai le malamalama mai luga.....”*

O le mea ua mautinoa tamaiti, e le gata o le faafetai a Sakaria i le Atua ona o Ioane, a ua ia faailoa foi le galuega o le a feagai ma ia. E fai o ia ma teuteu ala o le Alii, e muamua atu e faalaulelei le ala.

Tamaiti o le feau foi na mo i tatou, ia tatou iloa ona faafoi le faafetai i le Atua i aso uma o lo tatou ola. Auā o le Atua lava ia na te faaogaina ma tofofi lo tatou ola, i soo se mea e finagalo i ai.

GALUEGA FAATINO: Valivaliga

Faamolemole lau susuga le faiaoga, e tapena ane i ata e valivali e tamaiti.

PESE: Ou te fia alu le Aoga Aso Sa.
E vivii i le Atua le Tama,
Ou te fia alu le Aoga Aso Sa
E faalogo i le tala ia Iesu.
Ao Satani e faaosooso mai,
E faamisi le Aoga Aso Sa,
Ou te tulia ma tuli mamao ese.
E pule le Atua ia te a’u. (*tautala*)

A'OA'OGA:

1. Ia tatou iloa ona faafetaia se galuega lelei.
2. E tāua le lagonaina o le loto faafetai.

UA FAAFETAI SAKARIA I LE ALII



ASO SA: 13 APERILA 2025 (Laupama)

MATAUPU: O LE MALAGA FAATUPU A IESU

SINI: Ia malamalama le vasega, o le malaga faatupu a Iesu i Ierusalem o lona agai atu lava lea i ona puapuaga.

TUSI FAITAU: Mareko 11: 1-10

FESOASOANI MO FAIAOGA:

O ai le tamaititi e iloa o le a le Aso Sa lenei? Ia lena tonu lava. O le Aso Sa o le Laupama. O le Aso lenei lea e faamanatu ai e le au kerisiano uma lava le malaga faatupu a Iesu i Ierusalem, ma sauni atu ai i ona puapuaga.

O le tatou mataupu foi lena i lenei Aso Sa, pei foi ona i ai le tala sa faitauina. Fai mai o lea ua latalata Iesu i Ierusalem, ma ua oo atu foi i Petefake ma Petania, i le mauga tonu a lea e ta'ua o le mauga o Olive. Ona fetalai atu loa lea o le Alii i nisi o ona soo e toalua ma faapea atu:

“O ia oulua i le aai lua te lumanai; a oo i ai, lua te maua loa ai le tamai asini o loo noatia, e leai se tagata na tietie i ai; lua te tatalaina ma au mai. Afai foi e fai ane se tasi ia te oulua, Se a le mea lua te fai ai lea mea? ia oulua fai atu i ai, E manao i ai le Alii, a e toe faafoi vave mai.”

Ona o loa lea o le au soo nei e tusa o le fetalaiga a Iesu. Ua la o atu ma maua le asini o loo noatia i le faitotoa i fafo i le ala, ona la tatala loa lea. Fai mai ua tete'i a soo nei e toalua i le fai ane i ai o nisi na tutu i lea mea: “Sole se a le mea lua te tatala ai le asini” ona la tali atu lea faapei ona fetalai ai Iesu. Ona la taitaiina mai lea o le asini ia Iesu, ua lafo foi o latou ofu i luga ona tietie ai ai lea o Ia.

E toatele foi i latou ua latou fofolaina o latou ofu i le ala; a o isi ua latou ta ifo la o laau ma fola ai le ala, ao afio atu Iesu i Ierusalem. Ua latou Alalaga foi, “Osana, Osana, ia manuia le Afio mai i le suafa o le Alii, Osana, Osana, Osana i mea aupito a luga.”

Uiga o Upu:

- i) Osana – Laveai mai
- ii) Mauga o Olive – Mauga e ola ai le laau o le Olive.

GALUEGA FAATINO: Faatinoga

Faamolemole lau susuga e te tofofi ni tamaiti e latou te faatinoina lenei tala.

PESE: Osana pepese tamaiti uma.

A’OA;OGA:

1. Ia tatou fiafia ia Iesu le tupu.
2. Fiafia ma loto alofa.

O LE MALAGA FAATUPU A IESU I IERUSALEMA



ASO SA: 20 APERILA 2025 (ASO SA TOETU)

MATAUPU: UA TOETU IESU

SINI: Ia malamalama le vasega, o le toetu o Iesu, ua faailoa mai ai le alofa tunoa o le Atua.

TUSI FAITAU: Ioane 20: 11 – 18

FESOASOANI MO FAIAOGA:

Talofa tamaiti, o le a se taua o lenei Aso Sa mo i tatou? Ioe, o le aso lenei ua tatou faamanatuina ai le toetu mai o Iesu le Faaola mai le oti ma le tuugamau; i le aso tolu e pei ona molimauina e le Tusi Paia. O le tatou mataupu foi lea mo lenei aso; “UA TOETU IESU”.

Fai mai na muai usu po lava Maria le Makatala i le taeao i le tuugamau o Iesu ma ia iloa ai, ua aveeseina le ma’a mai le gutu o le tuugamau, ona tagi ai lava lea o ia i fafo ane o le tuugamau. Na ia iloa atu agelu e toalua i totonu o le tuugamau, o le isi i ulu o le mea na tuuina ai le tino Iesu, a o le isi i vae. Ua fesili mai i laua ia Maria pe aisea ua tagi ai, ae fai atu Maria, auā ua aveesea e tagata le tino Iesu, e le iloa foi po o fea ua latou tuuina ai. Ua fai atu upu ia a Maria ma faliu i tua ma ia iloa ai se tagata. Na ia faapea, o le tagata leoleo lea, peitai na te le iloaina, o Iesu lea. Na fetalai ane ai Iesu pe aisea e tagi ai, a o ai foi na te sailia. Na tali Maria ma faapea ane ia te Ia, ta’u atu ia ia te ia po o fea le mea ua tuuina ai le tino Iesu sei alu e aumai. Na toe fetalai ane Iesu ma faapea, Maria e, ona faliu loa lea o Maria ma fai atu Raponi e, ma aapa atu ia te Ia. Ua faapea mai Iesu, aua nei ona pai atu ia te Ia, auā e le’i alu a’e o Ia i lona Tamā, a ia alu ma faailoa i ona soo; e alu a’e o Ia i lona Tamā ma lo latou Tamā, o lona Atua ma lo latou Atua; ona alu ai lea o Maria ma ta’u atu ai i ona so’o

Tamaiti, o le tatou tala lena i le toetu mai o Iesu. O le faaolataga lea mo i tatou uma lava. O le alofa faaola, o le alofa lavea’i ma le alofa tunoa o le Atua ua faia mo i tatou, ina ia magalo ai i tatou.

Uiga o Upu:

- | | | | |
|------|-------------------|---|-------------------------------------|
| i) | Raponi e | - | Le a’oa’o e |
| ii) | agelu | - | ave feau a le Atua |
| iii) | Funa e, | - | Tamaitai e, |
| iv) | fetalai | - | fai atu, tautalai |
| v) | Maria le Makatala | - | O Maria e sau mai le nuu o Makatala |
| vi) | toetu Iesu | - | ua toe ola mai Iesu na oti. |

GALUEGA FAATINO: SA’O PE SESE

Tali mai i le Sa’o po o le Sese

1. Na tagi Maria i totonu o le tuugamau.
Tali: Sese

2. E toalua agelu sa i totonu o le tuugamau
Tali: Sa’o

3. Na tagi Maria ona ua le iloa po o fea ua tuuina ai le tino o Iesu

Tali: Sa'o.

4. O le taimi lava na faliu ai Maria na ia iloa ai o Iesu o lo o tu mai.

Tali: Sese.

5. "Raponi e," o le upu lea a Iesu na fetalai ai ia Maria

Tali: Sese

6. E le'i pa'i atu lava Maria ia Iesu ina ua ia iloa o Ia.

Tali: Sa'o

PESE: Ta'u atu, ua toetu Iesu
Ta'u atu, o le faaola mai
Ta'u atu, e malie ai ou man'o
Ta'u atu, ua toetu mai Iesu

Go tell, he is risen
Go tell, he can save, can save
Go tell, he can meet every need
Go tell, he arose from the dead

A'OA'OGA:

1. Ua toetu Iesu le Faaola.
2. E alofa mai pea le Atua ia i tatou.

UA TOETU IESU



ASO SA: 27 APERILA 2025

MATAUPU: UA FAFAGA E LE ATUA LONA NUU

SINI: Ia malamalama le vasega, e ui na muimui Isaraelu i le fia aai, ae na fafaga lava e le Atua.

TUSI FAITAU: Esoto 16: 1 – 8 mo le faiaoga
4 – 8 mo le vasega

FESOASOANI MO FAIAOGA:

O le tatou mataupu i lenei taeao tamaiti. “UA FAFAGA E LE ATUA LONA NUU.

A o i ai Isaraelu i le latou malaga umi mai Aikupito e agai atu i Kanana, ma ua latou o’o atu i le vao o Sina, e i le va o le nuu o Ailima ma Sinai. Ua lagona e tagata le fia aai, ona muimui loa lea ia Mose ma Arona.

Ona fetalai mai lea o le Atua ia Mose, 31 oi31 faatotoina ifo le mea e ai mai le lagi ma latou, e o atu foi i latou ma latou faaputuina, o le aso ma ana mea e tusa ai, ina ia tofotofo ai e le Atua ia Isaraelu, pe latou te savavali i ana tulafono pe leai. O le aso ono foi, latou te 31 oi31 le mea e au mai ai, e tailua mea i mea e faaputu ai i lea aso ma lea aso. Ua uma ona fetalai o le Atua ia Mose, ona fai atu lea o Mose ia Arona ina ia ta’u ai i le fanauga a Isaraelu.

O le afiafi latou te iloa ai, o le Atua lava na aumaia i latou nai le nuu o Aikupito. O le taeao foi, latou te vaai ai i le pupula o le Alii, ina ua faafofoga o Ia i lo latou muimui ia te Ia. O le afiafi, e foai mai ai e le Atua manu latou te aai ai, o le taeao foi, e foai mai ai le mea e ‘ai latou te maona ai lava, aua e le o i laua ua latou muimui i ai, a o le Atua lava ua latou muimui i ai.

O le tatou tala lena tamaiti, e ui ina ua silafia e le Atua le muimui o Isaraelu, ae na faatino lava lona alofa ma foa’iina mea e ‘ai 31 oi latou.

Uiga o Upu:

- i) muimui - tomumu
- ii) faatotoina - auina ifo/faatoulu ifo

GALUEGA FAATINO: TALIGA FESILI

Tali mai fesili nei

1. O ai na fetalai i ai le Atua?

Tali: O Mose na fetalai i ai le Atua.

2. O le a le fetalaiga a le Atua na fai ia Mose?

Tali: Na te faatotoina ifo le mea e ai mai le lagi ma latou ma Isaraelu.

3. A afiafi, o le a se mea o le a iloa ai e Isaraelu?

Tali: Latou te iloa ai o le Atua lava na aumaia i latou mai le nuu o Aikupito.

4. O a mea e auina ifo e le Atua i le afiafi ma Isaraelu?

Tali: O manu e auina ifo e le Atua mo Isaraelu.

5. O ai na muimui ai Isaraelu?

Tali: O Mose ma Arona atoa ai ma le Atua.

PESE: 1. Isaraelu ma le faigamalaga

E o mai Aikupito e agai i Kanana
Oso ai loa ma le mole o le manava
Tapa atu ia Mose e leai ni taumafa (x 2)

2. Mose ma Arona sei faalogo mai

O matou nei ua fia aai
A'o fea le Atua na lua fai mai ai
Oh! It's no good there's no food (x 2)

Tali: Isaraelu aua le popole vale

O le Atua e alofa mutimutivale

Na te aumai, le mania mai luga, tou te aai ai. (x 2)

A'OA'OGA:

1. E alofa mai pea le Atua 32 oi tatou.


2. Aua le ola muimui.

3. E aumai e le Atua mea tatou te manana'o ai.

O MANU MAI LE LAGI



O LE MANAI MAI LE LAGI



MANATU TAIALA O ME: IA OLA TAPENAPENA

O le ola tapenapena. Po o le ola sauniuni, o se tuualalo i le soifuaga ma talitonuga faalefaatuatua. Tapena ma sauni tagata uma i le folauga o i ai le lalolagi nei mo le manuia atali ua uma ona saunia e le Atua.

ASO SA: 4 ME 2025

MATAUPU: O TAUPOU POPOTO MA TAUPOU VALEA

SINI: Ia malamalama le vasega, o le tagata poto e tapena, a o le tagata valea e le tapena.

TUSI FAITAU: Mataio 25: 1 – 13

FESOASOANI MO FAIAOGA:

Talofa tamaiti, o le tatou mataupu i lenei taeao; “O taupou popoto ma taupou valea.”

O le tala sa tatou faitauina mai le tusi o Mataio, o le faataoto a Iesu e faatatau i le malo o le lagi po o le malo o le Atua. O taupou e sefulu na o e faafetaiai i le faatoafaiava. E toalima e popoto, e toalima foi e valea. O e popoto na ave a latou fagu suauu ma a latou lamepa. A o e valea na o a latou lamepa ae le'i avea ni a latou fagu suauu. Ua tuai mai le faatoafaiava, ona momoe ai lea o taupou. Ua oo i le tulua o po. Ma sau ai lea o le alaga, “Faauta ua sau le faatoafaiava, ina o ia outou e faafetaiai ia te ia.” Ua tutu i luga taupou ma sauniuni, peitai o le a mamate lamepa a taupou valea, ona latou aioi atu i taupou popoto, ina ia aumai ni a latou suauu ma latou. Na

tali mai taupou popoto ma faapea mai, nei le lava ai i latou, ae sili pe a latou o atu ma faatau mai ni a latou suauu, ona o ai lea o taupou valea.

Ua sau le faatoafaiava ma ulufale ma i latou uma sa i ai faatasi ma taupou popoto ona tapuni ai lea o le faitoto'a. e foi mai taupou valea ua pupuni le faitotoa, ona latou valaau atu lea i le faatoafaiava. "Le alii e, le alii e, ia e tatala mai le puipui mo i matou." A ua tali mai o ia, "E moni, ou te fai atu ia te outou, ou te le iloa outou, o lea, ia outou mataala ai, auā tou te le iloa le aso po o le itu aso e sau ai le Atalii o le tagata."

Talofa tamaiti i nai taupou valea, ua le maua so latou avanoa i totonu o le fale ona o le lē lava tapena. O lea e taua ai lo tatou ola tapena i taimi uma.

Uiga o Upu:

i)	lamepa	-	moli
ii)	faatoafaiava	-	tama faatoa faaipoipo
iii)	faafetaiai	-	faafeiloai\
iv)	taufai tule momoe	-	fia momoe
v)	mamate	-	pēpē moli/ua le ola moli
vi)	tausamaaga	-	'aiga tele
vii)	mataala	-	ola tapenapena/sauniuni

GALUEGA FAATINO: FAAFETAUAIGA (MATCHING)

Faafetaui upu nei ma o latou uiga sa'o

1.	lamepa	-	fia momoe
2.	faatoafaiava	-	pepe/ua le ola moli
3.	taufaitulemomoe	-	'aiga tele
4.	mamate	-	moli
5.	tausamaaga	-	ola tapenapena/sauniuni
6.	mataala	-	tama faatoa faaipoipo

PESE: E toasefulu taupou na o
E toasefulu ma a latou lamepa
E toa lima na lava tapena
Ae toa lima ua valea

O i latou na, na faatali i le aai
Aua le manuia ua valoia mai
Le faatoafaiava ua afio mai
Ae talofa, ua le iloa mai. (fati: E toasefulu lepela na o)

A'OA'OGA:

1. E taua le ola tapena i taimi uma
2. Ia tatou mataala i soo se taimi.

TAUPOU E TOA SEFULU



TAUPOU POPOTO



TAUPOU VALEA



ASO SA: 11 ME 2025 (ASO SA O TINĀ)

MATAUPU: O LE TINĀ USITAI

SINI: Ia malamalama le vasega, o le ola usiusitai o tina i le Atua, e manuia ai fanau.

TUSI FAITAU: 2 Tupu 4: 1 – 7

FESOASOANI MO FAIAOGA:

O le a foi le Aso Sa lenei tamaiti? Ioe, o le aso lenei e ua tatou faamanatuina ai le taua ma le aoga o tatou tinā. O le tatou mataupu la i lenei taeao; “O LE TINĀ USITAI”

O le tala sa o tatou faitauina mai le Tusi Paia, fai mai o le tasi fafine, o le avā a se tasi o le au perofeta. Ua valaau ia Elisaia le perofeta ina ua oti o lana tane, mo se fesoasoani ina ua alu atu le sa latou aitalafu i ai; na te aveesea ana tama tane e toalua e fai ma ana pologa. Na fesili i ai Elisaia pe i ai se mea o ia te ia i lona fale. Na tali le fafine, e leai se mea o i lona fale, ua na o le fagu suauu lava. Na ave ai loa lea o le fautuaga a Elisaia le perofeta, ina ia o e ao mai ni ipu ma utu ai le suauu, ona o lea e faatau atu ma maua mai ai tupe e totogi ai la latou aitalafu, a o le mea e totoe ai, ia tu’u mo ia ma lana fanau e ola ai. Sa faapea ona usitaia e le tinā lenei ma lana fanau le upu a Elisaia le perofeta, ona te’a ai lea o lo latou popole, ma ua le avea ai tama tane e toalua a le tinā lenei e fai ma pologa. Ua ola fiafia lenei aiga, ona o le usitaia o le upu a le perofeta.

GALUEGA FAATINO: FAATULAGAGA O FUAIUPU

Toe faatulaga mai fuaiupu nei i o latou tulaga sa’o e pei ona i ai i le Tusi Faitau.

1. a le tasi so’o/ Ua valaau ia Elisaia/ le avā o le au perofeta.

Tali: Ua valaau ia Elisaia le avā a le tasi so’o o le au perofeta.

2. o la’u tane/ Ua oti/ lau auauna.

Tali: Ua oti lau auauna o la’u tane.

3. fagu suauu/ o le /na /Ua/ lava.

Tali: Ua na o le fagu suauu lava.

4. o le suauu /Ona utu/ ai lea

Tali: Ona utu ai lea o le suauu.

5. Ona alu ai/ o ia/ lea/ ua/ i le tagata/ ta’u atu /o le Atua.

Tali: Ona alu ai lea o ia, ua ta’u atu i le tagata o le Atua.

PESE: Faalogo ma Usitai
E leai se isi ala
E fiafia ai Iesu
Na o le faaloga ma usitai (x 2)

A'OA'OGA:

1. Faalogo ma usitai i matua ma tagata matutua.
2. E taua le aoao mai o auaua a le Atua

O LE TINA MA LE FAGU SUAUU



ASO SA: 25 ME 2025

MATAUPU: UA FAAUINA SAULO E AVEA MA TUPU.

SINI: Ia malamalama le vasega, o le faauuina o Saulo e aveia ma tupu, o le aveia lava lea o ia e fai ma taitai ia Isaraelu.

TUSI FAITAU: 1 Samuelu 9: 25 – 10: 1

FESOASOANI MO FAIAOGA:

O le tatou mataupu i lenei taeao, “UA FAAUINA SAULO E AVEA MA TUPU”

Ua mavae atu taimi o Faamasino na tofia e le Atua e fai ma Faamasino ia Isaraelu, ona mananao ai lea o Isaraelu e fai so latou tupu. Na faafogaina e le Atua le manao o Isaraelu, e ui lava na le'i fiafia i ai o Ia. Peitai, na fetalai le Atua ia Samuelu ina ia usitai i mea uma na fai ane ai Isaraelu ia te ia. O lea na faasino ai e le Atua ia Samuelu le tama o Saulo ma le ituaiga o Peniamina e fai ma tupu ia Isaraelu.

O le vaega sa tatou faitauina, ua ave ai e Samuelu ia Saulo i le mea maualuga ma nonofo ai. Ua oo i le taeao, ona valaau lea o Samuelu ia Saulo e alu i luga o le fale ma faapea atu ai. Tulai ia, ou te tuu atu ia te oe e alu. “Mulimuli ane, ona o ai lea o Samuelu, o Saulo ma lana auauna. Ua fai atu Samuelu ia Saulo, ina ia tuu atu lana auauna e alu, a o ia, sei tu mai seia ona faailoa ma logologo atu le afioga a le Atua ia te ia. Ona faau'u ai lea e Samuelu o Saulo e fai ma tupu, na te taitaiina le nuu o Isaraelu.

GALUEGA FAATINO: FAATUMU AVANOA

Faatumu avanoa nei i upu o lo o i lalo e pei ona i ai i le tusi faitau: Samuelu, fagu, lilig, ulu, sogi, faau'u, alii.

Ona tago lea o _____ i le _____ u'u, ua _____ ifo ai i lona _____ ma _____ ia te ia; ua fai mai. E le ua _____ ea oe e le Alii e fai ma _____ i lona tofi?

PESE: Le manao o tagata mo le Atua
Fili o se tupu mo i latou
Faapei lava o isi nuu
Na te taitai Isaraelu

E ui na le fetai o lea tonu
Ae sa fai lava ma faataunuu
Faatonu loa Samuelu
Ave loa o Saulo ma faau. (fati: Le alofa o le Atua e ofoofogia.)

A'OA'OGA:

1. E taua tatou uma i le Atua.
2. E fa'aaogaina i tatou uma e le Atua i ana feau.

FAAUINA SAULO E SAMUELU



MANATU TAIALA O IUNI: TAUTINO I LE ATUA O TATOU MANAO

O le tautino i le Atua o o tatou manao, o le faailoa atu lava lea i le Atua o mea tatou te vaivai ai. O lona uiga o lo tatou ole atu lava lea i le Atua ia fesoasoani ma aumai le malosi lilo e mafai a ona tatou faatino lo tatou valaauina, ina ia faia lona finagalo. Tatou te talitonu lava, o le mea e gata ai lo tatou malosi ma le iloa, o iina e fa'aauau mai ai e le Atua i lona silafia ma lona malosi.

ASO SA: 1 IUNI 2025

MATAUPU: UA TATALO MOSE I LE ATUA

SINI: Ia malamalama le vasega e tali mai le Atua pe a tatou tatalo ia te ia ma le loto talitonu.

TUSI FAITAU: Esoto 4: 10 – 17

FESOASOANI MO FAIAOGA:

O le tatou mataupu tamaiti i lenei taeao, “O le tatalo a Mose i le Atua.”

O le tusi lea sa tatou faitauina, o lo o faailoa ai le aioi atu a Mose i le Atua, i le lēmafai lea ona ia fai se lauga, e le matala lona gutu, e le matala foi lona laulaufaiva. Tou te iloa tamaiti, o le tali atu lena a Mose i le Atua, e tusa ai ma lona valaauina e le Atua e alu e aumai lona nuu mai Aikupito. Ua outou iloa foi le nuu o le Atua, o Isaraelu, la o lo o nofo pologa i Aikkupito. O le mea tonu lava lena, na fetalai atu ai le Atua ia Mose e alu e aumai lona nuu. Ia faalogo la i le tali a Mose. “A e alofa, Le Alii e, o au o le tagata e le iloa fai lauga talu anamua ma ona po nei .. ua le matala lou gutu ua le matala foi lou laulaufaiva.”

Ona fetalai mai lea o le Atua ia te ia, “O ai ea na ia faia le gutu o le tagata, po o ai na ia faia le gugū? Po o le tutuli? Po o le vaai po o le tauaso. E le o a’u ea o le Alii?” O lenei alu ia oe, o au foi ou te faatasi ma lou gutu, ou te a’oa’o atu foi ia te oe i upu e te tautala atu ai. Ae ua toe tali atu Mose, A e alofa, le Alii, ia e auina atu se tasi e tatau ona e auina atu ai. Ona toasa tele ai lea o le Alii ia Mose, ua fetalai mai, “E le o lou uso ea o Arona le sa Levi? Ua ou iloa e fai lauga lelei lava ia, faauta foi o lo o sau o ia e fetaia’i ia te oe, a iloa mai foi e ia oe, ona fiafia ai lea o lona loto. E te tautala atu lava ia te ia, ma tuu atu ai ia upu i lona gutu, ou te faatasi foi ma lou gutu a lona gutu ou te a’oa’o foi ia te oulua i mea uma lua te faia.

E tautala atu ia mo oe i le nuu, e fai foi o ia ma gutu mo oe, e fai foi oe ma Atua mo ia. O lona tootoo foi e te ave i lou lima, e te fai ai faailoga.

Tamaiti, o le tala atoa i le aioi po o le tatalo atu a Mose i le Atua, ina ua valaau i ai le Atua e alu e laveai mai lona nuu mai Aikupito. O se tatalo e faaoioi i le Atua, ona na te le mafai ona alu e faafesaga’i ma Farao, ia po o le palaai foi. O lea foi ua tali le Atua, e leai se mea e faigata pe a o faatasi ma le Atua. Ua saunia foi e le Atua isi auala, e pei o le auina ane o Arona e fai ma fesoasoani. Ioe, a valaauina i tatou e le Atua mo ana feau, ‘aia tatou te tatalo pe tali atu e le mafai, ae aioi i ai e fesoasoani mai ia i tatou, pe faapefea ona tatou faia lona finagalo.

Manuia tele outou le fanau.

Uiga o Upu ma Fuaitau:

- i) anamua ma ona po nei – tausaga ma aso ua leva, na tea e oo mai lava i le taimi nei.
- ii) gugu - le mafai ona tautala
- iii) tutuli - le lagona se mea
- iv) tauaso - le iloa se mea i mata
- v) to'asā - ita po o le to'atamai.

GALUEGA FAATINO: Tali fesili i le “Sa’o” po o le “Sese”

FESILI

1. Ua fai atu Mose i le Atua, ou te le alu ona ou te gugu.
Tali: Sese
2. O le finagalo o le Atua ia alu Mose e lavea’i mai lona nu’u mai Aikupito.
Tali: Sa’o
3. O Arona le uso o Mose na la nonofo i Aikupito.
Tali: Sese
4. Ua tatou iloa i lenei tala e pule le Atua i mea uma lava.
Tali: Sa’o
5. E lei talia e le Atua le mea na manao i ai Mose.
Tali: Sa’o

PESE: Fetalai le Atua ia Mose

Alu e lavea’i mai lo’u nuu
O si ou nuu pele o Isaraelu
Ia faasaoloto mai le pologa.

2. Ua fai atu Mose i le Atua
O ia o se tagata faatauvaa
E le iloa foi fai lauga
I luma o Farao ma ona tagata
3. Ua faamalosia atu le Atua
Ia Mose e alu e fai le galuega
O le a fesoasoani atu Arona
Ou te ia te oe foi i aso uma.

A’OA’OGA:

1. A finagalo le Atua i se feau tatou te faia, fai ma le usitai
2. E lē faia ni o tatou loto ae fai lava le finagalo o le Atua
3. E faatonu mai pea le Atua i o tatou ola auauna.

UA TATALO MOSE I LE ATUA



ASO SA: 8 IUNI 2025

MATAUPU: UA TATALO HANA I LE ATUA

SINI: Ia malamalama le vasega e fa'afofoga le Atua ma tali mai ia tatou tatalo.

TUSI FAITAU: 1 Samuelu 1: 10-12

FESOASOANI MO FAIA'OGA

Talofa tamaiti, o la tatou mataupu i lenei taeao, UA TATALO HANA I LE ATUA. Faimai ua leva ona nonofo le fafine o Hana ma lona to'alua o Elekana ae le i maua lava se tama a Hana, ona o le pule a le Atua na le fanau ai o ia. O lea na ia tatalo atu ai ma tagi atu i le Atua mo le fia maua o sana tama. O le ala lea o le fa'amatalaina mai e le tusi faitau, ua tiga lona loto, ua ole atu i le Alii, ma ua tagi tele. Ua ia tauto foi ua fa'apea atu, le Alii o 'au e, afai e te silasila mai i le puapuaga o lau auauna fafine, ma e manatu mai ia te a'u, ae le fa'agalogalo mai i lau auauna fafine, ma e foa'i mai i lau auauna fafine se tama tane, ona ou foa'i atu lea o ia i le Alii i aso uma o lona ola; e le o'o foi se tafi i lona ulu.

Tamaiti, na tatalo Hana ma fa'apea atu i le Atua, afai e foa'i mai sana tama, o le a na toe foa'i atu e auauna mo le Atua. O se tala fiafia, na fa'afofoga le Atua ma foa'iina mai ia Hana le tama na ia mana'o i ai.

Tamaiti, o lea foi e to'a'aga o tatou matua e fai lotu ma tatalo atu i le Atua, mo tatou le fanau, ina ia manuia a tatou a'oga o lo'o feagai ai. Faimai na tatalo Hana e na te toe avatu lava i le Atua le tama pe afai e tali mai le Atua i lana tatalo.

O le mana'oga foi lena o tatou matua mo tatou tamaiti, ina ia avea i tatou e fai ma 'au'auna a le Atua, ia usita'i ma fa'alogo i faife'au po'o 'au'auna a le Atua, ia usita'i i matua ma faia'oga, po'o ta'ita'i foi e manuia ai tatou.

Uiga o Upu:

- i) Tatalo - O le ta'u atu ma ole atu i le Atua mo se mana'oga.
- ii) Faitaulaga - O le faife'au o lo'o faia lotu ma ta'ita'i tagata i le Atua
- iii) Puapuaga - O tiga ma mafatiaga ua fa'anoanoa ai.

GALUEGA FA'ATINO: Taliga fesili

i. Aisea na tagi ai Hana ma tatalo atu i le Atua?

Tali. Ona o lona mana'o ia maua sana tama.

2. O le a se mea na fai atu ai Hana i le Atua e le o'o i le tama pe a foa'i mai e le Atua mo ia?

Tali. E le o'o se tafi i lona ulu.

3v. O ai lea tagata e igoa ia Eli?

Tali. O le faitaulaga.

PESE Sa tatalo le teine o Hana.
Na ona memu ae le tautala

A'OA'OGA:

1. E fa'afofoga le Atua ia tatou tatalo.
2. To'aga e tatalo i le Atua e manuia ai.
3. Aua le tatalo ma le masalosalo.

UA TATALO HANA I LE ATUA



ASO SA: 15 IUNI 2025

MATAUPU: UA VALAAU IONA I LE ALII

SINI: Ia malamalama le vasega o le valaau a Iona i le Alii, ina ia lavea'iina o ia mai ona puapuaga.

TUSI FAITAU: Iona 2: 1 – 10

FESOASOANI MO FAIAOGA:

Tamaiti, o ai foi lea na folo e le i'a? Ia lena, o Iona la lea o le a fai i ai le tatou tala, pei ona tatou faitauina i le tatou Tusi Faitau o lenei Aso Sa.

Sei faitau faatasi mai le fuaiupu (1) muamua o le tatou tusi lea sa faitau. Ioe, fai mai sa tatalo foi Iona i le Alii Iona Atua i le manava o le i'a. O Iona uiga e sa'o a la le tatou tali i le fesili, po o ai na folo e le i'a? O Iona: O lea la ua tatou iloa nei, o le taimi tonu lea na valaau pe tatalo ai Iona i le Alii Iona Atua. O le tatalo e tusa lava ma le valaau pe a i ai se mea tatou te mananao ai i le Atua a tamaiti, auā a tatou valaau i le Atua i se mea tatou te mananao ai, ona tatou faapea lea, Le Atua sei sau lava e fesoasani mai ia te au. E leai, tatou te faapea atu, Le Atua e, alofa ma fesoasani mai ia te au. Ia o lea la ua tatalo pe valaau foi Iona i le Alii Iona Atua.

O le mea malie tamaiti, o Iona lea na sola mai le Atua. Ina ua valaau le Atua e alu e tau atu le feau i Nineva. A'e sola, a o lea ua vave lava ona toe tapa i le Atua ina ua oo i puapuaga.

A faapu'upu'u upu o le tatalo po o le valaau a Iona i le Atua. Ona faapea lea, Le Atua ia e alofa mai i ou puapuaga ma e faafofoga mai i la'u aioi atu. Auā ua mafatia lava au ma ua tigaina, i le loloto o le sami ma totonu o le manava o le i'a. Alofa ma faaola mai a'u. Ua alofa le Atua ia Iona ma fetalai ane loa i le i'a ina ia luai ane Iona i le elele matutu.

Faalogo la outou tamaiti i le alofa tele o le Atua, o lea na Ia toe faaola ai ia Iona. Ma, o lea foi le tali a le Atua i le valaau po o le tatalo a Iona,

Manuia tele outou le fanau.

Uiga o Upu:

- i) puapuaga - mea tiga ma faigata e feagai ma tagata
- ii) moana - sami loloto
- iii) faafofoga - faalogo
- iv) lafoa'iina - ua le amanaia, ua tiaina
- v) faatauva - tulaga mauualalo
- vi) luai - toe pua'i mai fafo/pe toe aumai i fafo
- (vii) anaana - loto atu i se mea/gauai i le finagalo o le Atua

GALUEGA FAATINO:

Tali i Fesili

1) Aisea na valaau ai Iona i le Atua?

Tali: O le fiaola

2. O fea na valaau pe tatalo ai Iona i le Atua?

Tali: Totonu o le manava o le i'a.

3. Na tali la le Atua i le valaau a Iona?

Tali: Ioe

4. Faapefea ona faatino le tali a le Atua?

Tali: Na fetalai le Atua i le i'a, e luai Iona i le eleele matutu.

5. O le a le umi na i ai Iona i le manava o le i'a?

Tali: Tolu po, tolu ao

PESE:

1. O ai na folo e le i'a?

O Iona le perofeta

Aisea na folo ai

Tetee i le Atua

Talfoa e, ia Iona

Le faafiapoto tele naua

Na tete'e ai i le Atua

Ua folo ai e le i'a

2. O ai na folo e le i'a

O Iona le perofeta

Aisea na folo ai?

Ua sola i Tasesa

Talofa e, ia Iona

Le faafiapoto ua e le naua

Na sola ai i Tasesa

Ua folo ai e le i'a

3. O ai na folo e le ia

O Iona le perofeta

Aisea na folo ai

Fiapoto i le Atua

Talofa e, ia Iona

Le faafiapoto ua tele naua

Ua toe alaga foi e a

Le Atua i le fiaola

A'OA'OGA:

1. E tali le Atua i o tatou puapuaga
2. Valaau ma tatalo i le Atua i taimi uma tatou te mafatia ai
3. Ia lagona lo tatou salamo i le Atua pe a tatou sese.

UA VALAAU IONA I LE ALII MAI TOTONU O LE I'A



LUAI MAI E LE I'A IONA I LE ELEELE MATUTU



ASO SA: 22 IUNI 2025

MATAUPU: UA FAAMALOLOINA E IESU LE AFAFINE O LE PULE I LE SUNAKO.

SINI: Ia malamalama le vasega, o le aioi atu o Iairo ia Iesu; ina ia faamaloloina le ma'i o lona afafine.

TUSI FAITAU: Mareko 5: 35 – 42

FESOASOANI MO FAIAOGA:

O le tatou tala tamaiti i lenei Aso Sa, o le faamaloloina lea e Iesu o le afafine o le pule i le sunako e pei ona ia mana'o i ai. Peitai, na i ai nisi galuega sa faalavelave ai le agai atu o Iesu i lea faamoemoe; ina ua uma atu ia galuega, ae ua o mai nisi mai le fale o le pule i le sunako/Iairo, ua faapea mai ia te ia; Ua oti lou afafine se a le mea e te faalavelave ai i le a'oa'o. A o Iesu ua faalogo atu i le tala ua aumai e nei tagata. Ona fetalai atu lea o Ia i le pule i le sunako, 'Aua e te mata'u, tau lava ina e faatuatua.' Ona maluu atu loa lea o Iesu i le fale o le pule i le sunako, a ua mulimuli atu i ai na o Peteru, Iakopo ma Ioane.

Ua iloa ai e Ia le lauaitu, le taufaitagi ma le taufailaue tele. Ua ulufale atu Ia ona faapea atu ai lea ia te i latou; "Se a le mea ua outou pisao ai, ma outou fetagisi ai, e le o oti le teine, ua na ona moe."

Ona tago atu lea o Ia i le lima. O le teine, ma ua fetalai atu ia te ia, "Talita kumi." O le faamatalaina lenei, "Funa e, ou te fai atu ia te oe, ia e tula'i." Ona tulai loa lea o le teine ma ua savali. Faalogo la outou tamaiti i le mana fai vavega o Iesu, ua Ia toe faaolaina ai le afafine o Iairo po o le pule i le sunako. O lea foi ua tali ai le aioi ma le faatauanau a Iairo ia Iesu, a ea tamaiti. O le tatou mataupu foi lenei o lenei Aso Sa.

Manuia tele outou le fanau.

Uiga o Upu:

- i) sunako - malumalu po o le falesa
- ii) aioi - tuanau
- iii) faaee - tuu i luga
- iv) lauaitu, taufaitagi, taufailaue - tutusa uma uiga o le fetagisi leo tetele ma pisapisao
- vi) segia le maui - ua tei/ofo

GALUEGA FAATINO:

Faatino le tala, e le vasega, ae faatonotonu e lau susuga i le faiaoga.

PESE:

1. Iesu faamalolo i ma'i x 3\
O tagata uma o le lalolagi
2. Pipili tauaso ma ma'i vevela x 3
Faapea ma ma'i lepela
3. O e tinovale ma e gugu x 3
E malolo ia Iesu
4. Talitonu loa ma faatuatua x 3
O Iesu le Alo o le Atua (fati: Osana pepese tamaiti uma)

A'OA'OGA:

1. E tali Iesu i o tatou manaoga.
2. O Iesu o le Alii tali mana'o.

UA FAAMALOLO E IESU LE AFAFINE O IAIRO



ASO SA: 29 IUNI 2025

MATAUPU: UA FESILI IOANE IA IESU

SINI: Ia malamalama le vasega, o le fia iloa e Ioane po o Iesu lea ua afio mai, na ia auina atu ai ona so'o e fesili ia te Ia.

TUSI FAITAU; Luka 7: 18 – 23

FESOASOANI MO FAIAOGA:

O le tatou mataupu tamaiti i lenei Aso Sa – Ua fesili Ioane ia Iesu'. O le fesili tamaiti, Aisea ua fesili ai fua Ioane ia Iesu, o le a se mea o fia iloa e Ioane e uiga ia Iesu? O le tali o le fesili lea, e maua i le tala sa tatou faitau i ai i le Tusi a Ioane 7: 18 – 23. Ua faalogo Ioane (O ai foi Ioane tamaiti. Ioe, O Ioane le papatiso) i vavega ma galuega ua faia e Iesus. Ona tupu lea o lona manatu po o le tagata lea e igoa ia Iesu o lo o faatali i ai le toatele o tagata, pe leai.

O le ala lea na auina atu ai loa e Ioane ona so'o e toalua, sei fesili i ai po o Ia tonu lea o lo o ua maliu mai (Iesu) po o i ai se tasi o faatalitali i ai? A o le taimi tonu lea o lo o fai le galuega faamalolo a Iesu i le toatele o tagata o i ai ma'i eseese. O ma'i tiga ma agaga leaga ma e tauaso ua pupula.

Ona tali atu lea o Ia ia te i laua, ua faapea, "Ina o atu ia oulua faailoa atu ia Ioane, o mea ua oulua vaai i ai ma faalogo i ai. Ua pupula tauaso, ua savavli pipili, ua faamamaina lepela, ua logo tutuli, ua faatutuina e ua oti ma folafolaina le tala lelei i e matitiva. E manuia foi se le tausuai ia te Ia."

Ia, tamaiti na toe foi lava so'o ia e toalua o Ioane ma tau atu ia te ia mea na la vaai ma faalogo ai. O iina na talitou ai Ioane o Iesu lava lea ua auina mai e le Atua, aua ua iloa lelei e Ioane ua na o le Atua na auina mai Iesu, na te mafaia i lona mana ona fai o ia mea. O le tatou mataupu foi lenei o lenei Aso Sa. Ua tatou iloa ai o le tali lea o le fsili a Ioane. O Iesu moni lava lea, le Alo o le Atua ua auina mai e faaola le lalolagi.

Uiga o Upu:

- i) folafolaina - ta'uta'u atu, faailoa atu
- ii) tausuai - fa'aamuamu, po o le faaulaula, tau faaleaga, faatauemu

GALUEGA FAATINO:

Faatumu avanoa i upu nei:- Iesu, valaau, Ioane, faatali, tasi, oe, so'o matou, faapea aauina, to'alua, la'ua.

Ona _____ atu lea e _____ i ona _____ se _____, ua aauina atu i _____ ia _____, Ua _____ ane; po o _____-ea le _____ mai, pe _____ te _____ atu i se _____

PESE:

1. Ioane papatiso vaitafe Ioritana
Vaitafe Ioritana x 2
Ioane papatiso vaitafe Ioritana
O lo o tau alaga i tagata
Ina salamo ia, ua latalata mai le malo le Atua
2. Ioane papatiso vaitafe Ioritana
Vaitafe Ioritana x 2
Ioane papatiso vaitafe Ioritana
Ua fesili ia Iesu, “O oe ea le maliu mai, pe matou te faatali
i se tasi.”
3. Ioane papatiso vaitafe Ioritana
Vaitafe Ioritana x 2
Ioane papaitso vaitafe Ioritana
Faalogo i le tali a Iesu, “Na ou faamaloloina ma’i tiga uma,
Ua faamamaina lepela, ua taatuina e na oti,
Ua folafolaina le tala lelei i e matitiva. O Au lava lena.”
(fati: Ioane Papatiso vaitafe Ioritana –
a oo loa i le laina na e ona taultala loa lea)

A’OA’OGA:

1. O le fesili e atili malamalama ai se mea.
2. Tatou te iloa Iesu i ana upu, ae sili atu lo tatou iloa i ana galuega.
3. E talitonu gofie tagata pe a vaai i galuega e te faia.

IESU MA SOO O IOANE



MANATU TAIALA O IULAI: O LE ATUA O LE ALOFA LAVA IA

O la Ioane le Aposetolo i lana tusi muamua, mataupu e fa (4), a’o le fuaiupu e sefulu ma le ono (16) “O i tatou foi ua tatou iloa ma ua faatutua i le alofa ua i le Atua ia i tatou. O le Atua o le alofa lava Ia. O le tumau i le alofa, ua tumau ia i totonu o le Atua. O le Atua foi o i totonu ia te ia. O lē e alofa ua ia te ia le Atua, a o lē lē alofa, ua lē ia te ia le Atua.

ASO SA: 6 IULAI 2025

MATAUPU: O LE TAMĀ ALOFA

SINI: Ia malamalama le vasega, o le tamā alofa. O Ia lava o le Atua loto faamagalo. (E telegese lona toasa ae tele nauā na alofa)

TUSI FAITAU: Luka 15: 21 – 24

FESOASOANI MO FAIAOGA:

O fuaiupu ia sa tatou faalogologo ai ma faitau, o fuaiupu ma tala o lo o taua ma faamatala ai se tasi o tala faa faatusa a Iesu e igoa; “O le uii faamaumauoa” Lea la ua oo mai le tala, i le toe foi o le uii i lona tamā. E faapea le tala, ina ua uma le tamaoiga, o tupe sa alu ma lenei tama, ona faamaumau ma fa’aaoga e faamalie ai ona manao ma tuinanauga o le lalolagi ma ana uo. Na matua oo lava lona olaga i le aai faatasi ma pua’a. ona salamō ai lea ma toe fia foi i lona tama. Ma ua ia fai atu foi i lona tamā – “Ua ou agasala i le o i le lagi atoa ma ou luma, ua ou le toe aoga ona ta’ua o lou atalii.” A ua fai atu le tamā i ana auauna aumai se ofu tatapuvae e faaofu ia te ia ma se mama e tuu i lona lima faasee i ona vae. A aumai foi se tamai povi peti e fasi, tatou te aai ma olioli ai, auā o lou atalii lenei na oti, ua toe ola mai, na leiloa foi o ia, a ua maua, ona latou olioli ai lea.

Ioe, tamaiti o le uiga lea o le tamā alofa mutimutivale, na te le manatua ni uiga leaga o lona atalii, ma le tele o ni tamaoiga na faamaumauina. Na pau le mea na manatu i ai le tamā, ona ua toe foi atu ua salamō. Ona alofa mutimutivale lea o le tama i le atalii, ma faamagalo ma faagalo ni ona leaga. Ia o le ata foi lea o le va feagai ai o tatou ma le Atua. A tatou iloa ua sese ma leaga ni mea ua tatou faia – Ia tatou lagona le loto salamo, toe foi i le Atua, i le tatalo faatauanau ina ia faamagalo i tatou, mo toe aveva ai i tatou ma tamaiti lelei, ma fiafia mai i ai le Atua i le lumanai.

Uiga o Upu

- i) ofu tatapuvae - o se ofu talaloa e um ii lalo, e oo lava i tapuvae o le tagata
- ii) ta’ase - fai o seevae
- iii) olioli - fiafia

GALUEGA FAATINO:

Faasino upu faafeagai uiga o upu o le laina muamua i le laina lona lua.

- | | | | | |
|----|---------|---|----|-----------|
| 1) | atalii | - | 2) | matai |
| 2) | tama e | - | | oti |
| 3) | lagi | - | | faanoanoa |
| 4) | auauna | - | | tina e |
| 5) | ola | - | | lalolagi |
| 6) | le iloa | - | | afafine |
| 7) | olioli | - | | ua maua |

- PESE:**
- 1) Le alofa o le Atua e ofoofogia
Le alofa o le Atua e matautia
Le alofa o le Atua e ofoofogia
Le alofa silisili lea mo a’u
 - 2) E faamagalo ia tatou agasala
E le manatua foi ni o tatou leaga
Ae sili lona alofa i tagata uma lava
Le alofa silisili lea mo au.
 - 3) E telegese foi lona toasā
Ae tele lava lona alofa
E le faailogaina se tagata
Le alofa silisili lea mo au.
(fati; Le alofa o le Atua e ofoofogia – new version)

A'OA'OGA:

1. E alofa le Atua ia i tatou uma.
2. O le Atua alofa faamagalo.
3. O le Aua e telegese lona toasa, ae tele lona alofa.

O LE TAMA ALOFA





ASO SA: 13 IULAI 2025

MATAUPU: FILIFILI LE VAEGA LELEI

SINI: Ia malamalama le vasega, o le filifili i le vaega lelei o lo tatou ‘au atu lava lea i le mea o finagalo i ai Iesu.

TUSI FAITAU: Luka 10: 38 – 42

FESOASOANI MO FAIAOGA:

O le tatou tala i lenei taeao, o lenei foi Aso Sa, ua faaulutalaina – “Filifili le vaega lelei.” A o femaliu ai Iesu i lana galuega talai ona afe ane lea i le tasi aai. O le fafine e igoa ia Mareta, ua ia talia o ia i lona fale. A o Mareta e i ai lona uso e igoa ia Maria. Fai mai la le tala, na ona alu atu lava o Iesu i totonu o le fale, alu ane loa ma Maria ua nofo i tafatafa o aao o Iesu, ona usi loa lea o lana faalogo i fetalaiiga a Iesu, po o a’oa’oga a Iesu i le malo o le Atua. A o le taimi lena, o lo o pisi toatasi Mareta e tapena mea uma e tali ai le afio ane o Iesu, o lona uiga o le tapenaga o le fale, o mea e tofa ai Iesu, aemaise foi o ni taumafa e tali ai le sua a le Alii.

Ua le fiafia Mareta, ona ua na o ia lava o lo o faia feau ma tapena mea uma. A o la lava e nofonofa Maria ma faalogologo ia Iesu. Ua tiga lava le lotu o Mareta, ona ia fai ane loa lea ia Iesu, se’i e fai ane ia ia te ia (Maria) e fesoasoani mai ia te a’u. Ua tali atu Iesu ia Mareta, ua e popole ma ua pupu lou lotu i mea e tele a o le mea lava e tasi e ao ina e maua, ua filifilia foi e Maria lenei mea lelei e le aveeseina ia te ia.

Tamaiti, lea ua outou faalogo i le tatou tala ma a’oa’oga o lea ua fetalai tuu sa’o mai ai Iesu ia i tatou. O lo tatou fiafia e faalogologo ia Iesu, o le tatou filifili lava lea i le vaega lelei. Ae tou te iloa la tamaiti, e le faapea o le mea sa faia e Mareta. O se filifiliga lea i se vaega leaga. E leai, o le vaega lelei foi, auā e tatau ona tapenapena ma sauniuni lelei mea tali ai malo. Aua e taua foi le tali lelei o malo, ina ia fiafia ai le malo e nofo i totonu o se aiga. A o le uiga o le fetalaiiga a Iesu. O le mea e ave i ai le faamuamua, po o mea faalelagi po o mea faa le lalolagi. O ni a’oa’oga lelei foi lea mo outou le fanau, Ia toaaga mai i Aoga Aso Sa, ma lotu aua o aoga ia tatou te maua ai upu o le ola ia Iesu Keriso, ae le o le nonofo i aiga ma fai feau. Ia manuia foi le alo atu i aoaga o lenei vaiaso.

Uiga o Upu:

- i) tigā - lē fiafia po o ua ita.
- ii) fatuaiga - feau e faia i totonu o fale, galuega e faia i totonu o aiga.
- iii) pupu - faamamafa, ua matele i ai le lotu.
- iv) afe atu - ui atu
- v) faliu - ua faasaga i ai.

GALUEGA FAATINO: Faavasega

Faavasega upu ua taua i lalo i le vaega lelei ma le vaega leaga:-

Faamaualuga, alofa, loto maulalo, faalii, pepelo, gaoi, loto mama, fiafia, filemu, ulavale, faamisa, ma le usitai.

Vaega Lelei

- 1.
- 2.
- 3.
- 4.
- 5.
- 6.

Vaega Leaga

- 1.
- 2.
- 3.
- 4.
- 5.
- 6.

PESE: Ua ou filifili e mulimuli ia Iesu
I have decided to follow Jesus

A'OA'OGA:

- 1, Tatou te maua ia Iesu mea lelei uma.
2. E fiafia Iesu pe a o tatou filifilia ona ala.
3. E lelei mea uma ua ia Iesu.

IESU I LE FALE O MARIA MA MARETA





ASO SA: 20 IULAI 2025

MATAUPU: O LE MASALOSALOVALE O PETERU

SINI: Ia malamalama le vasega o le masalosalovale o Peteru na mafua ai ona magoto i le vai.

TUSI FAITAU: Mataio 14: 22 – 33

FESOASOANI MO FAIAOGA:

Tamaiti, o le tatou mataupu foi o leni Aso Sa o le “Masalosalovale o Peteru.” O a nisi upu e sui ai le upu masalosalovale, ae tutusa lava ona uiga? O le lē talitonu, lē mautonu, popole vale ia po o le lē faatuatua foi. A o ai la Peteru? Ioe, o le so’o o Iesu.

O le tala e faapea, ina ua uma ona fafagaina e Iesu o le motu o tagata i le vao, ona fetalai atu lea o Iesu i ona soo, ina ia o atu loa i le vaa ma latou muamua atu ai i le isi itu vai, a o Ia, e nofo seia o ese atu le motu o tagata. Ua tuua na o Iesu, ona alu a’e lea i le mauga e tatalo, a ua afiafi lava. A o le vaa na o ai le ’au soo, ua i totonu o le vasa, ua felafoaina i le sou, aua ua agi mai luma le matagi.

Ona maliu atu ai lea o Iesu ia te i latou, i le taimi po o le vaveao o lo o savali i luga o le vai. Ua iloa atu e le ’au so’o, ona latou fefefe ai lea ma ua matatau. Ua latou faapea ane foi; ‘O le aitu’ A o Iesu ua fetalai ane ia te i latou, “Ia outou loto tetele o a’u lava, aua tou te matata’u.”

O Peteru lava na muamua tali atu ia te Ia, “Le Alii e, afai o oe, ia e fetalai mai ia te a’u, 61ut e alu atu ia te oe i luga o le vai.” Ona fetalai atu ai lea o Iesu ia te ia, “Ina sau ia.” Ona alu ifo ai lea o Peteru nai le va’a. Ua savali i luga o le vai, e alu ia Iesu.

Ua vaai atu Peteru i le matagi, ua agi tele mai, ona fefe ai lea, ua afua ai ona goto, ua alaga mai, “Alii e, faaola mai.”

Ona aapa atu loa lea o le aao o Iesu, ua tago ia te ia, ua faapea atu “O oe lena le faatuatua itiiti, se a le mea ua e masalosalovale ai?” Ona la o a’e lea i le vaa, ona malu ai lea o le matagi. A ua o mai e nai le vaa, ua ifo mai ia te Ia (Iesu) ua faapea mai, “E moni lava o oe o le Alo o le Atua.”

O le tatou tala foi lena i leni taeao, ua tatou iloa ai foi, le le lava o le faatuatua o Peteru le so’o o Iesu. Na ona vaai atu lava i sou ma le agi o le matagi, fefe loa, ona mafua ai lea ona 61ut e61 le vai. A o Iesu ua aapa atu lona aao ma toe toso mai i luga o le vaa. Tatou iloa la tamaiti, o mea uma tatou te ole atu ai e ala i le tatalo ma le talitonu faamaoni, e tali mai lava le Atua.

Ia manuia tele outou le fanau ma ia manuia a outou aoga o leni foi vaiaso.

Uiga o Upu:

- | | | | |
|------|----------------|---|------------------------------------|
| i) | masalosalovale | - | popole vale po o le le mautonu. |
| ii) | vasa | - | ogasami tele |
| iii) | felafoa’iina | - | ua taumalua ona o le sou o le vasa |
| iv) | matatau | - | fefefe ma palaai |
| v) | aitu | - | temoni/agaga leaga |
| vi) | sou | - | louloua le aso |
| vii) | tuunai | - | tuu atu, faamamulu |

GALUEGA FAATINO:

Faatulaga sa'o amataga o fuaiupu o i lalo, mai le fuaiupu e tatau ona muamua i le fuaiupu mullimuli

- 4 - Ua maliu atu Iesu ia te i latou
- 3 - A o le vaa ua i totonu le vasa
- 6 - Ona fetalai atu loa lea o Iesu
- 1 - Ona tuunai loa lea o Iesu i ona so'o
- 5 - Ua iloa mai e le au so'o o Ia
- 2 - Ua tuuina e ia le motu o tagata e o

PESE: 1) Ua savali atu o Iesu i luga o le vai,
A o le au so'o ua fefefe ma pala'aai
Ua latou alaga. Aue o le aitu
Latou te le iloa o Ia lava o Iesu

- 2) Ua faalogo atu i ai o Peteru
Ua valaau atu ia Iesu ua afio mai
Fetalai mai ia 62ut e alu atu i luga o le vai
A o lona masalosalo, na vave goto ifo ai i lalo

O le au soo masalosalovale, le faatuatua, o Ia o le Alo o le Atua
Talitonu nei ma faatuatua ia Iesu, tatou te maua ai le ola e faavavau
(fati: 62ut e alu 62ut e siva i le po – Misiluki)

A'OA'OGA:

- 1. E leaga le masalosalovale
- 2. Faatuatua ma talitonu ia Iesu
- 3. E laveai mai Iesu ia i tatou pe a feagai ma faafitauli.

SAVALI IESU I LUGA O LE VAI



ASO SA: 27 IULAI 2025

MATAUPU: AVE FEAU O LE MALO O LE ATUA

SINI: Ia malamalama le vasega, o Iesu lava na ia uluai tofia i latou e fai ma ave feau o le malo o le Atua.

TUSI FAITAU: Luka 10: 1, 3 – 9

FESOASOANI MO FAIAOGA:

Tamaiti, o le tatou tala sa faitauina e faatatau mo lenei Aso Sa: Ave feau o le malo o le Atua. O ave feau o i latou ia ua tofia e o atu e ta'uta'u atu se feau. Faataitaiga faigofie: Afai ou te fai atu ia Ioane, e alu e fai i lona tamā, pe i ai sana tupe e aumai ma a'u. O lona uiga la o Ioane le ave feau, a o le feau e alu Ioane e ta'u i lona tamā, pe i ai sana tupe e aumai ma a'u.

Tou te iloa la o le a le feau lea o le a o i ai i latou ua tofia e Iesu e ave. Ioe, talai le malo o le Atua. Ta'uta'u atu le malo o le Atua. O lo o taua i le fuaiupu muamua (1), e toa fitusefulu i latou ua filifilia. O i latou foi ia sa mulimuli ia Iesu ma silafia ai e Iesu, o ni tagata ua talafeagai lelei mo le feau e pei ona finagalo ai le Alii.

Ua fetalai atu foi Iesu, ia o latou o taitoalua, ma ia muamua atu ia te Ia i mea uma o le a maliu atu i ai. Ma ia latou o ma le loto maualalo, aua o le a feagai ma faafitauli ma faigata o le galuega talai. O le uiga lena o le fetalaiga a Iesu; “Na te auina atu i latou e pei ona o tamai mamoe i le va o luko,”

Aua foi tou te ave se ete tupe po o se taga, po o se seevae, aua foi tou te ofo alofa atu i se tasi i le ala, ina nei faalavelaveina le latou feau tala'i ona o le faalavelave ina e nisi tagata! Afai foi e afe atu ma ulu i se fale, tou te muai fai atu, “Ia manuia le aiga nei.” Pe afai o i ai le tagata o le manuia, e oo atu ia te ia la outou faamanuia, a leai, e toe foi atu ia te outou. Ia outou nonofo ai i lea fale, ma aai ma inu i mea latou te avane, aua e tatau ona avatu i le faigaluega lona tau. O le aai tou te oo atu i ai, ua latou talia foi outou, ia outou aai i mea ua laulauina mai ia te outou. Ia outou faamalolo foi i e mama'i o i ai, ma ia fai atu ia te i latou, ua latalata ia te outou le malo o le Atua.

Ioe, tamaiti o mea uma lava la na faatonu ai e Iesu, le toafitugafu o e na tofia, e o atu ma tala'i atu i tagata. O mea uma foi ia e tatau ona latou faia e manuia ai i latou. Tamaiti o ai se ave feauo lo o i totonu o le tatou nuu le na auina mai e le Atua e talai mai le Tala Lelei po o le talai le malo o le Atua.

Ioe, sa'o lelei, o le tamā ma le tinā faale-agaga po o le tatou faifeau foi. Afai la tatou tee faalogo ma usitai i mea o lo o a'oa'oina ai i tatou e o tatou matua faaleagaga. Tatou te mautinoa lava o le a manuia ai foi tatou. Mania outou le fanau.

Uiga o Upu:

- i) toafitugafulu - e fitu sefulu po o le numera 70
- ii) tofia - o le filifilia
- iii) luko - o se manuvaefa e feai, foliga pei o se maile.
- iv) muai - muamua
- v) faamalolo - faamalolosi ma'i
- vi) ete tupe - ato tupe

GALUEGA FAATINO:

Lisi ni upu se lima (5) e tutusa sipelaga/tutusa lo latou sipelaina ae sili atu i le tasi (1) le uiga. Faailoa le eseesea o uiga i fuaiupu.

Faaitaiga:

- (1) ala (i) ala e savavali ai tagata
(ii) Ua ala Simi sa moe.
(iii) O le a le ala o le o mai o le tou aiga i le matou faalavelave?
- (2) fai(i) Sole fai atu i tamaiti e o mai
(ii) Suga, alu e fai le galuega la e fai mai le teine le la
- (3) tatau (i) Toma e tatau ona e alu i le lotu i Aso Sa
(ii) E uma nei ona ta le tatau a Su
(iii) Sole, tatau mai se peepee
- (4) aai (i) Sa aai tamaiti i le aoga
(ii) E manaia le teuga aai a le malo
- (5) faamalolo (i) Ua faamalolo e Iesu le ma'i lepela
(ii) Faamalolo lelei le tama aua le toe fealua'i o lena e ma'i
- (6) maliu (i) Ua maliu Iesu i le mauga
(ii) Ua maliu si au uo

PESE:

Ave, ave lo'u ola ia aoga
Ave, ia fa'aaoga mo le Atua
Ave, ave lo'u ola ave lo'u ola
Ave lo'u ola ia aoga mo le Atua

Ave, ave ou lima aoga
Ave, ia fa'aaoga mo le Atua
Ave, ave, o'u lima, Ave o'u lima
Ave ou lima, ia aoga mo le Atua.

Ave ave ou vae ia aoga
Ave, ia fa'aaoga mo le Atua
Ave, ave ou vae, ave ou vae
Ave o vae ia aoga mo le Atua

Ave,ave, lou leo ia aoga
Ave, ia fa'aaoga mo le Atua
Ave, ave lou leo, ave lou leo
Ave lou leo, ia aoga mo le Aua.

A'OA'OGA:

1. Ia tatou fiafia e fai i tatou ma avefeau o le Tala Lelei.
2. E faigofie ona tatou faia le feau a le Alii, pe a faalogo i ana faatonuga.

AUINA ATU E IESU LE TOA FITUSEFULU



MANATU TAIALA AOKUSO: O IESU E TALI I O TATOU MANAO

O Iesu lava na fetalai “Ia outou ole atu, ona foaiina mai ai lea ia te outou, ia outou saili, ona outou maua ai lea, ia outou tu’itu’i atu, ona toina ai lea ia te outou. Aua ai se ole atu e maua e ia, oe saili foi e iloa e ia, e toina foi i le tui’itu’i atu.” O lea lava ua fetalai tu’usao’o Iesu o Ia lava na te tali i o tatou mana’o, pea fa tatou te ole atu ma le faatuatua.

ASO SA: 3 AOKUSO 2025

MATAUPU: O NIKOTEMO LE FAIPULE IUTAIA

SINI: Ia malamalama le vasega o Nikotemo lea, na alu ia Iesu e fesili i ai, pe faapefea ona maua le malo o le Atua.

TUSI FAITAU: Ioane 3: 1 – 5

FESOASOANI MO FAIAOGA:

O ai se isi na te iloa se tala e uiga i lenei tagata e igoa ia Nikotemo? Ia lelei. Sei toe faitasi le tatou mataupu, o lenei Aso Sa? Fai faatasi tamaiti, “O Nikotemo le faipule Iutaia.” Ia, lena o le tagata lena e igoa ia Nikotemo, ae le gata foi i lea, o lea foi na tatou faitauina i le amataga lava o le fuaiupu (1) muamua, O ia o se tasi o le au Faresaio. O Faresaio tamiati o i latou ia ua ta’ua o ta’ita’i o le lotu Iutaia.

O le latou faamamafa lava o le tausiga ole tulafono. O ia foi o le faipule, o ni tagata maualuluga o le malo, ia po o e foi e taitai i totonu o nuu ma afioaga, pei o ni matai taua ia i totonu o nuu, pei o tatou.

O le tala e faapea, ua o’o i le tasi afiafi po, ona alu ane lea o le tagata lea e Nikotemo ia Iesu. Ua ia fai ane ia Iesu, “Rapi e, ua matou iloa o oe o le a’oa’o na maliu mai le Atua, aua e le mafai e se tasi ona fai o faailoga e te faia, ana le ia te ia le Atua.”

O le uiga o le tala a Nikotemo. Afai ua mafai ona Ia (Iesu) faia ia faailoga ma silafia le malo le Atua. E faapefea la ona ia (Nikotemo) iloa le malo le Atua? Ua tali atu Iesu, afai e le toe fanau le tagata e le mafai ona iloa e ia le malo le Atua. Ua toe fai atu Nikotemo pe mafai faapefea ona toe fanau le tagata ua toaina? E mafai ea ona toe ofi i le manava o lona tinā?

Ua toe fai atu Iesu “E moni, e moni ou te fai atu ia te oe; Afai e le fanau se tasi i le vai ma le agaga e le mafai ona sao atu i le malo o le Atua.” O le uiga o le tali atu a Iesu, e le o le toe fanau mai, e pei ona fanau mai o se pepe mai se tinā, ae o le toe faafouina o le ola faale-Agaga. Ia matua toe liliu atoa le ola mai le faamamafa o mea o le lalolagi, a ia ave le faamuamua i le itu faale-Agaga.

Atonu, e tau faapea foi ni mafaufauga ma ni lagona o matua, ma tatou le fanau. Lea e ala ai ona fai atu ia te outou e toaaga i aoga Aso Sa ma aoga a le Faifeau. Aua o mea ia e a’oa’oina ai outou le fanau i mea faale-agaga. Tatou te iloa ai a’oa’oga a Iesu, i le ola usitai, ola faamagalalo, loto maualalo ma loto mama, ola faamaoni ma le alofa. O uiga uma ia tatou te ola fiafia ai ma fealofani ai. O le finagalalo foi lea o le Atua mo tatou uma, ia tatou ola usitai ma ava i o tatou matua aemaise o lo tatou ola e matata’u i le Atua. O le mea lea tatou te maua ai foi faamanuiaga mai lo tatou Atua. Ia manuia tele outou tamaiti ma ia outou toaaga mai i le Aoga Aso Sa ma lotu.

Uiga o Upu:

- i) faresaio - igoa e ave i e tausī tulafono/taitai o le lotu Iutaia.
- ii) faipule - tagata fai tulafono (Faataitaiga - O tagata ia e i totonu o fono fai tulafono a Samoa (Palemene o Samoa)
- iii) Rapi - a'oa'o
- iv) faailoga - faailoilo e faia e Iesu.
(faataitaiga – vavega)
- v) Malo o le Atua - malo e pulea e le Aua.

GALUEGA FAATINO: Tali Fesili

1. O le a le galuega a Nikotemo?

Tali: O le faipule/faresaio

2. O le a tonu le taimi na alu ane ai Nikotemo ia Iesu?

Tali: O le po.

3. O le a le manao o Nikotemo ia Iesu?

Tali: Fia iloa le malo o le Atua/ola faavavau)

4. O le a le tali a Iesu i lea manao?

Tali: A le toe fanau le tagata e le mafai ona iloa e ia le malo o le Atua.

PESE: 1)

O Nikotemo na alu ia Iesu
E faailoa mai o le ola e faavavau
Na ia alu atu i le taimi ua pogisa
Ia le iloa mai o ia e tagata

2)

Ua tali Iesu ia toe fanaufouina
O la Nikotemo ua le mafai ua toeaina
E faapefea ona toe ofi i se manava
E leai, e le mafai se mea faapena

3)

Ua toe fai atu Iesu e le o lena
A o le fanau i le vai ma le agaga
O lona uiga o lou loto ia faamama
Ma salamo moni ma ia faatuatua

A'OA'OGA:

- 1. Na o Iesu na te silafia tagata moni o le malo o le Atua
- 2. O tatou o tagata o le malo o le Atua pe a tatou amio lelei.

NIKOTEMO LE FAIPULE IUTAIA MA IESU



ASO SA: 10 AOKUSO 2025

**MATAUPU: O LE MEA ALOFA A IESU I ONA SOO
(ASO SA O TAMĀ)**

SINI: Ia malamalama le vasega na foaiina foi e Iesu le Agaga Paia e fai ma meaalofo i ona so'o.

TUSI FAITAU: Ioane 14: 25 – 27

FESOASOANI MO FAIAOGA:

Tamaiti, o le tatou mataupu foi o lenei Aso Sa. O le meaalofo a Iesu i ona so'o. E masani ona outou maua mai ni meaalofo mai nisi tagata? O ai la ia tagata e maua mai ai a tatou meaalofo? Ioe, e masani ona maua mai tatou meaalofo mai o tatou matua, ia po o nai o tatou tei matutua, e mai nisi o tatou uo. A o a la taimi e masani ona tatou maua ai ia meaalofo? Ioe, tele lava i taimi o aso fiafia, o le kirisimasi ma le tausaga fou. O nisi foi taimi, e fai meaalofo mai ai tagata o le a Malaga ese atu ma o tatou aiga. Ae maise lava tatou aiga po o tagata e malaga mai fafo, e tafafao mai ma mafuta i nai aso. A oo loa o le a toe foi i atunuu na malaga mai ai, ona aumai ai lea o meaalofo mo tatou, e pei o ofu, uati, seevae ma tupe ma isi. Ona o loa lea, ae tatou fiafia ma faafetai ua maua mai ai a tatou meaalofo.

Ua lata ona toe foi atu Iesu i lona Tamā (O le Atua lea e Afio i le lagi) ona ia apoapoi lea ma faamafanafana i ona so'o. Ua silafia e Iesu o le a alu, ae tuua na o ona soo. Ua manatu Iesu na te tuuina atu se meaalofo mo latou (so'o), e fesoasoani mo latou pe a Ia tuua le mafutaga. O nisi o ana toe upu; "O mea ia na ou fai atu ai ia te outou a'o tatou nonofo ma outou. O i ai le fesoasoani, o le Agaga Paia lea e auina ifo e mai lo'u Tama (le Atua) o Ia lava na te a'oa'o i mea uma lava na te faamanatu foi ia te outou o mea uma ua ou fai atu ai ia te outou. Ua tuuina atu foi e Iesu le manuia ia i latou e fa'aauau ai le galuega.

Ua tou faalogo la tamaiti, i le manaia ma le lelei o meaalofo ua foa'iina atu e Iesu i ona so'o, o le Agaga Paia ma le manuia, ina ia mafai ai ona latou tutumau le Alii, aemaise e mafai ai ona latou fa'aauau i le galuega sa faia e Iesu, e aunoa ma lona auai i le tino faatasi ma i latou (ona so'o). Ia tamaiti, o le a se mea faapito o faamanatu i le Aso lenei, Ioe o le Aso Sa o Tamā. E tatau foi ona tatou fai meaalofo mo tatou tama. O le a la se tatou meaalofo lelei mo tamā. E tele a meaalofo eseese e pei o se ofu, seevae, o se uati ia po o nisi lava mea e ave mo tamā. Ae tou te iloa la, o a outou meaalofo ia, o tinā lava latou te faatauina ia mea mo outou.

Tamaiti, o lau meaalofo silsiili lava mo tama, o lo tatou usiusitai lea i mea uma e manao ai tama ia te oe.. Ia manuia tele outou lefanau, ma ia manuia foi le Aso Sa mo tatou tama.

Uiga o Upu:

- i) manu - Seanoa, pe afai
- ii) atuatuvaile - popole vale, le mautonu
- iii) matatau - fefefe, pala'a'ai

GALUEGA FAATINO: Tali Fesili

1. O ai e faatatau i ai le upu Tama? O loo taua e Iesu?

Tali: O le Atua.

2. O ai e faatatau i ai upu “outou” o lo o i ai le tusi sa tatou faitauina?

Tali: O so’o Iesu.

3. O le a le meaalofa a Iesu?

Tali: O le Agaga Paia.

4. O le a tonu le taimi na fetalai ai Iesu i ia ipu, pei ona tatou faitauina i le Tusi Faitau?

Tali: Taimi o le a afio a’e ai i le lagi i lona Tama.

PESE:

E alofa Iesu ia i tatou uma
I tatou uma x 2
E alofa Iesu ia i tatou uma
E alofa ia i tatou uma.
E alofa ia tama, e alofa ia tina
E alofa i lou uso ma lou tuafafine
E alofa ia te oe, e alofa ia te au
E alofa ia i tatou uma.

A’OA’OGA:

1. E le tuulafoa’iina e Iesu ona so’o.

2. O le Agaga Paia o le fesoasoani sili mo tagata uma.

3. O le manuia mai ia Iesu na loto tetele ai le au so’o.

**MEAALOFA A IESU I ONA SOO: AGAGA PAIA
FAATUSA O LE AGAGA PAIA**



ASO SA: 17 AOKUSO 2025

MATAUPU VALA'AU A LE LEOLEO MAMOE

SINI: Ia malamalama le vasega e vala'au e le leoleo mamoe ana mamoe i o latou igoa ma ta'ita'i ia i latou.

TUSI FAITAU: Ioane 10: 1-6

FESOASOANI MO LE FAIA'OGA.

Talofa vasega laitii, o la tatou mataupu i lenei taeao, O LE VALA'AU A LE LEOLEO MAMOE. Ua fa'amatala e Ioane le a'oa'oga a le Alii o Iesu Keriso na ia fetalai atu ai i lona auso'o filifilia, i le vala'au a le leoleo mamoe. Ua a'oa'o atu Iesu e ui atu le leoleo mamoe i le faitoto'a, ona to mai lea e le leoleo faitoto'a le puipui, ona vala'au atu lea e le leoleo mamoe igoa o ana mamoe, ona lagona lea e mamoe o latou igoa, ma fa'alogo i le vala'au alofa a lo latou leoleo mamoe.

Faimai e vala'au mamoe e le leoleo mamoe i o latou lava igoa. Na te ta'ita'i atu foi ia te i latou. ona latou mulimuli atu lea aua ua latou iloa po ua latou masani i lona leo, na te ta'ita'i atu foi ia te i latou. Tamaiti, o le isi uiga o le upu ta'ita'i, o le leoleo, puipui ma fa'asaogalemu mai ni fa'afitauli. Ua a'oa'o mai foi le tusi faitau, e i ai tagata gaoui latou te le ui mai le faitoto'a ae ui ane i se tasi mea. O tagata ese ia e taumafai e gaoui mamoe, peita'i e le iloa e mamoe leo o tagata ese. Faimai e le mulimuli atu mamoe i se tagata ese, ae sosola ese aua latou te le iloa leo o tagata ese.

Tamaiti, o lo tatou Alii o Iesu Keriso le leoleo mamoe lelei, e vala'au mai ma le alofa ia i tatou lana fanau ina ia puipuia mai fili ma le ti'apolo. O lo' o vala'au mai pea Iesu ia i tatou i lana vala'au alofa ma le filemu. Tamaiti, ua tu'uina mai e Iesu le leoleoina o ana mamoe i faife'au po'o 'au'auna a le Atua, ma matua, po'o faia'oga ma ta'ita'i. O lea ia outou fa'alogo, usiusita'i ma mulimuli atu i le vala'au a o outou leoleo na, aua e alolofa moni ma agalelei ia te outou.

Uiga o Upu.

- i) Leoleo mamoe - Tagata e leoleoina mamoe.
- ii) Leoleo faitoto'a - O le tagata e tatalaina le pa mamoe.
- iii) Tagata ese - Tagata gaoui.
- iv) Fa'ata'oto - O se tala fa'atusa e i ai lona uiga loloto.

GALUEGA FA'ATINO: Taliga fesili

1. Aisea e tatala ai e le leoleo faitoto'a le faitoto'a?

Tali: Ina ua iloa o le leoleo mamoe lea ua ui atu i le faitoto'a.

2. A tu'uina atu mamoe, o fea e i ai le leoleo mamoe?

Tali: E muamua atu ia i ai, ona mulimuli atu ai lea o mamoe ia te ia, aua ua latou iloa lona leo.

3. O ai ia ua ta'ua e Iesu o le gaoui ma le faomea?

Tali: O i latou o e le ui atu i le faitoto'a o i totonu o le lotoa mamoe, ae ui ane i se isi mea.

PESE: Alaga le si'ufofoga o le leoleo mamoe.
I fafo le pogisa po'o fea o i ai,
Vala'au i mamoe ua le iloa,
Ua mamao atu ma le leoleo mamoe

Aumai i totonu x 2
Aumai i totonu nai le agasala
Aumai i totonu x2
Aumai i latou ia Iesu.

A'OA'OGA:

1. O Iesu le leoleo mamoe lelei.
2. E muamua pea le leoleo mamoe ae mulimuli atu mamoe.
3. Aua le fa'alogo i leo o tagata gaofi po'o tagata taufa'asese.

O LE LEOLEO MAMOE



ASO SA: 24 AOKUSO 2025

MATAUPU: O FUA O LE AGAGA

SINI: Ia malamalama le vasega o fua o le Agaga o uiga lelei ia e tatau ona ola ai.

TUSI FAITAU: Kalatia 5: 22 – 25

FESOASOANI MO FAIAOGA:

Talofa vasega laiti, o la tatou mataupu i lenei taeao, O FUA O LE AGAGA. O le tusi ia Kalatia sa tatou faitauina tamaiti, o lo’o fa’apea ona a’oa’oina atu e Paulo le aposetolo i tagata o Kalatia ina ia latou iloa fua o le Agaga Pa’ia o le Atua, o lona uiga o uiga lelei e molimauina ai ua i ai i le tagata le Agaga Pa’ia. O fua la nei, o le alofa, o le olioli, o le filemu, o le onosa’i, o le mataalofa, o le agalelei ma le fa’amaoni, o le agamalu ma le le gaoiā; e le fa’atulafonoina mea fa’apena. Tamaiti, o le tagata la ua i ai fua nei o le Agaga, o ia tonu lena ua ola i uiga lelei e maua mai le Agaga o le Atua.

Ua a’oa’o atu foi i le Ekalesia i Kalatia, o e ua ia Keriso ua fa’asatauroina e i latou le tino, ma ona mana’o ma ona tu’inanau, ae ua maua tonu lava e ia le ola i le Agaga. E pei ona fa’aalia mai o fua o le Agaga o le alofa, o lona uiga e le ita pe inoino, e olioli, o lona uiga e le fa’anoanoa pe fa’aū’ū, e filemu ae le malovale, e onosa’i ae le fa’alii, e mataalofa ae le matafa’asiasia, e agalelei ae le agaleaga, e fa’amaoni ae le talapelo, e agamalu ae le amio pa’a’ā, e le gaoiā ae to’amalie.

A ola le tagata i fua o le Agaga, ua lelei lona loto, ua amio lelei, ua matua ta’uleleia ma viia lona olaga e tagata, ae sili ona fiafia i ai le Atua.

Uiga o Upu:

- i) .Fua o le Agaga - O amioga lelei e va’aia mai tagata ua talia Iesu.
- ii) Agaga o le Atua - O le mana lea o le Atua e ta’ita’ina tatou.
- iii) Tu’inanau - O le loto atu lea i mea ua mana’o i ai.
- iv) Ekalesia i Kalatia - O le aulotu i Kalatia

GALUEGA FAATINO: TALIGA FESILI

Tali mai i le sa’o pe sese.

1. Pe afai ua ia te oe fua o le Agaga, ua matua fa’ateteleina lou ita i le isi tamaitiiti.
Tali. Sese
2. O fua o le Agaga e lavea ai ma le mana’o i le tupe a le isi tagata.
Tali. Sese
3. O le mataalofa e mafua ona o le va’ai ma le alofa i le isi tagata.
Tali Sa’o
4. O le filemu o lou to’amalie lea ma lou loto ua fa’amanuiaina.

Tali Sa'o

TA'U MAI LE FA'AFEAGAI O UPU NEI:

- | | | | |
|----|-----------|---|------------------------|
| 1 | .Alofa | - | inoino pe ita |
| 2. | Olioli | - | fa'anoanoa pe fa'aū'ū |
| 3. | Filemu | - | malovale pe vevesi |
| 4. | Onosa'i | = | fa'alii pe itaitagofie |
| 5. | Mataalofa | - | matafa'asiasia |
| 6. | Agalelei | - | agaleaga |
| 7. | Fa'amaoni | - | talapelo |
| 8. | Agamalu | - | amio pa'a'ā |
| 9 | .Le gaoiā | - | le to'amalie. |

FA'ASA'O SIPELAGA O UPU

- | | | | |
|----|-----------|---|-----------|
| 1. | Iloilo | - | olioli |
| 2. | Faloa | - | alofa |
| 3. | Lumaaga | - | agamalu |
| 4. | Onimaafa | - | fa'amaoni |
| 5. | Tamfalaoa | - | mataalofa |

O A FA'AFEAGAI O UPU NEI?

- | | | | |
|----|-----------|---|------------|
| 1. | Alofa | - | inoino |
| 2. | Fa'amaoni | - | talapepelo |
| 3. | Olioli | - | fa'anoanoa |
| 4. | Agamalu | - | fa'asaua |
| 5. | Agalelei | - | agaleaga |

- PESE :**
1. Folau i luga o le vasa o Lona alofa x2
Sa'oloto sa'oloto e pei o se lupe,
Folau i luga o le vasa o Lona alofa.
 2. Sailing on the sea of His love x2
Free, free as a dove
Sailing on the sea of His love.

A'OA'OGA:

1. E aoga fua o le Agaga e manuia ai.
2. E lelei le tamaitiiti e fa'amaoni.
3. E alofa le Atua ia te i tatou.

FUA O LE AGAGA: FAASOA MA ISI TAGATA I AMIO

MAI LE TUSI PAIA



ASO SA: 31 AOKUSO 2025

MATAUPU: O LE ALOFA FA'AMAGALO O IESU

SINI: Ia malamalama le vasega o le alofa o Iesu e fa'amagalo ai o tatou sese ma agasala.

TUSU FAITAU: Ioane 8:7 – 11

FESOASOANI MO LE FAIA'OGA.

Talofa Vsega laiti, o le ulutala o la tatou mataupu i lenei taeao, O LE ALOFA FA'AMAGALO O IESU. Tou te iloa tamaiti le uiga o le upu fa'amagalo? O le upu fa'amagalo, o le suia lea o se mea sa 'o'ona, fa'ata'ita'iga pe afai o se ipu ti e le i fa'asukaina, ona tu'u loa lea i ai o se sipuni suka, ona magalo lea po ua suamalie ma tofo lelei a tamaiti? Va'ai outou, o le a tu'u la le iputi 'o'ona e magalo pe a fa'asukaina, ae o la tatou mataupu, e fa'atatau i le amioga sese a se tasi fafine na fai, ae alofa i ai Iesu ma na fa'amagaloina lana amioga leaga na faia. Toe fa'alogo, o le amioga sese a se tasi fafine na fai, ae alofa i ai Iesu ma na fa'amagaloina lana amioga leaga na faia. O le uiga tonu lena o le fa'amagalo lea e fa'atatau i ai la tatou mataupu i lenei taeao.

Vasega laiti, faimai o le tasi fafine ua leaga lana amio ua fai, ona o ane ai lea o tagata e fa'asala ia te ia, ma latou ta'u atu ia Iesu o le tulafono a Mose e tatau ona fetogi ia te ia ia oti ai, ae po'o le a sona loto. Ae ua fa'asaga atu Iesu ma fa'apea atu, "O so outou e leai sana agasala, ia lua'i togi se ma'a ia te ia." O lona uiga, ua le manatu Iesu e fa'asala le fafine ae ua ia fa'amagaloina o ia.

O le taimi na fa'alogo ai lea upu a Iesu, faimai ua latou iloa a latou agasala i o latou loto fuatia ifo, ona ta'itoatasi lea o i latou ma alu i fafo. O le a'oa'oga tamaiti ua tu'u e Iesu i totonu o lenei mea na tupu, o lona alofa ua fai lea ma mea lelei ua magalo ai le amio leaga a le fafine. E o mai tagata ina ia fa'asala e tau ai le leaga, ae avatu e Iesu lona alofa e fa'amagalo ai le sese o le fafine.

Tamaiti, e taua tele le alofa fa'amagalo o Iesu, ua ola ma fa'asaoina ai le fafine agasala. Faimai ua silafia e Iesu ua o ese tagata na omai e fa'asala le fafine, ona fetalai atu lea o Ia, "Ou te le fa'asala foi ia te oe. Alu ia oe, aua e te toe agasala." O la tatou mataupu lena tamaiti, ia manuia tele outou.

Uiga o Upu:

- i) Alofa - O le agalelei ma le loto fesoasoani i so'o se tagata.
- ii) Fa'amagalo - Ua le tau le agasala i le fa'asalaga ae ae tau i le alofa.
- iii) Ia lua'i togi - Ia muamua ona togi
- iv) Funa - O le tamaita'i po'o le fafine.

GALUEGA FA'ATINO: Tali sa'o pe sese

1. O le fafine agasala sa fasi ma taua'i i ma'a.
Tali Sese

2. O le to'atele ia o fafine na omai e fa'asala le fafine.

Tali Sese

3. Sa fa'amagalo e Iesu le fafine agasala.

Tali Sa'o

4 Sa iloa e tagata a latou agasala i o latou loto fua'itia ifo, ona o ai lea.

Tali Sa'o.

PESE: 1. E lelei le Atua x3

E alofa o Ia

2. Ua magalo a'u agasala x3

E alofa o Ia

3. Lenei ua ou sa'oloto x3

E alofa o Ia


A'OA'OGA:

1. O le alofa o Iesu e magalo ai tatou.

2. Aua le agaleaga ae ia loto fa'amagalo atu.

3. Ia tatou lavea'iina tagata.

ALOFA FAAMAGALO O IESU



MANATU TAIALA O SETEMA & OKETOPA: O LE ATUA NA TE FAAFOUINA LO TATOU MALOSI

E moni ma faamaoni upu ua fai ma taiala, auā o le Atua lava Ia, o le pogai lea o lo tatou malosi. Malosi i la le tino, mafaufau atoa ma le agaga. Po o le a lo tatou vaivai, ua na o le Atua lava e faafouina ai lo tatou malosi.

ASO SA: 7 SETEMA 2025 (ASO SA TALA LELEI)

MATAUPU: UA TA’U ATU E TINĀ LE TALA LELEI.

SINI: Ia malamalama le vasega, o tinā na latou mua’i ta’u atu le Tala Lelei i le toetu mai o Iesu.

TUSI FAITAU: Mataio 28: 1 – 10

FESOASOANI MO FAIAOGA:

Talofa tamaiti, o a mai outou i lenei taeao? Maeu le alofa ma le agalelei o le Atua, ua mafai ai ona tatou toe mafuta i lenei foi taeao. O ai se isi o ona manatua, pe na te ta’u maia se taua o le aso lenei. Ioe, o le aso lenei o lo o faamanatuina ai le taunuu mai o le Tala Lelei i si o tatou atunuu o Samoa. O le Tala Lelei e uiga i le maliu ma le toetu mai o Iesu la tatou uo. O le faaolataga mo le faamagaloina o a tatou agasala ma le lalolagi atoa.

Fai mai, ua mavae le maliu o Iesu, ua uma foi ona tuuina atu lona tino i le tuugamau. Ua mavae aso e tolu ma ua oo i le uluai aso o le vaisapati. Ua ala usu lava tinā nei i le taeao, o Maria le Makatala ma le isi Maria e asiasi i le tuugamau o Iesu. Na faafuasei ona to pe lulu le mafuie ina ua alu le agelu a le Alii mai le lagi ma fuli ese le maa i le gutu o le tuugamau, ma tietie ai i ona luga. O ona foliga e pei o le uila, o ona ofu foi e pei o le sinasina o le kiona. Ua fefefe foi e na leoleo i le tuugamau ma ua liua e pei o tagata oti. Ua fai atu foi le agelu i tinā nei, “Aua lua te matata’u ouluga; auā ua ou iloa ua ouluga sailia mai Iesu na faasatauroina. E le o iina o Ia, aua ua toe tu mai o Ia, e pei ona fetalai atu ai o Ia. O mai, ina matamata i le mea na tuu ai le Alii. Ina o atu ia ia vave, lua e ta’u atu i ona so’o ua toe tu mai o Ia nai e ua oti, faauta foi, e muamua atu Ia ia te outou i Kalilaia; tou te iloa ai o Ia i lea mea.” Ua la o, ona latou fetaiai ai lea ma Iesu, ma toe fetalai ai foi Iesu i upu e pei ona faia e le agelu. E muamua atu o Ia i ona so’o i Kalilaia latou te iloa ai o Ia. Na o fiafia i laua ma ta’u atu i ona so’o.

Tamaiti, ia fai i tatou ma tagata e ta’uta’u atu le tala e uiga ia Iesu ae le o tala leaga.

Uiga o Upu:

- | | | | |
|------|----------|---|---------------------|
| i) | sapati | - | Aso Sa |
| ii) | tuugamau | - | fanuaoti |
| iii) | sinasina | - | pa’epa’e ma |
| iv) | tetemu | - | le mautonu |
| v) | matatau | - | fefefe |
| vi) | fetaiai | - | fetaui |
| vii) | fetalai | - | fai atu/tautala atu |

GALUEGA FAATINO: FAAFETAUAIGA (MATCHING)

Faafetaui Upu nei ma o latou uiga

- | | | |
|-------------|---|---------------------|
| 1. sapati | - | pa'epa'e ma |
| 2. tuugamau | - | fetaui |
| 3. sinasina | - | fai atu/tautala atu |
| 4. tetemu | - | fanuaoti |
| 5. matata'u | - | Aso Sa |
| 6. fetaia'i | - | le mautonu |
| 7. fetalai | - | fefefe |

PESE : Ta'u atu ua toetu Iesu.
Tau atu o le faaola mai
Tau atu e malie ai ou manao
Tau atu ua toetu mai Iesu

Go tell, he is risen
Go tell, he can save, can save
Go tell, he can meet every need
Go tell, he arose from the dead

A'OA'OGA:

1. Ia ta'u atu le Tala Lelei.
2. Ia fiafia e tautala i tala lelei ae le o tala le lelei.

TINA I LE TUUGAMAU O IESU





ASO SA: 14 SETEMA 2025

MATAUPU: O LE FANAU MAI O MOSE

SINI: Ia malamalama le vasega, o le afafine o Farao na ia faasaoina le ola o Mose.

TUSI FAITAU: Esoto 2: 1 – 9

FESOASOANI MO FAIAOGA:

Talofa tamaiti, o a mai outou i lenei taeao? Faafetai i le alofa o le Atua ua mafai ai ona tatou toe mafuta fialia i lenei Aso Sa. O le tatou mataupu i lenei taeao; “O LE FANAU MAI O MOSE.”

O le a se mea na tupu tatou te manatua ai le tagata lenei o Mose? Ioe, Mose lea na taina le papa ma puna mai ai le vai, lea na feinu ai Isaraelu ma a latou manu. Faapea foi i le sami ulaula lea sa vaeluaina, ma le tele o isi vavega na tutupu ai.

Fai mai a o i ai Isaraelu i Aikupito, na fai ai e Farao le tulafono pe a fananau fafine Isaraelu e faapea, “A fanau mai o se tama ona fasiotia lea, ae a fanau mai o se teine, ia faasaoina.” O le ala lea na faalafi pe nana ai e le tinā o Mose ia lana tama nei fasiotia o ia. Fai mai ua atoa le tolu masina o le tama ma ua le mafai ona toe natiaina o ia. Ua tonu ai i le manatu o le tinā, ia lalagaina se ato kome ma tuu i ai Mose ona tuu lea i le auvai o le vaitafe.

Sa faapea ona fai ona mulimuli ai lea o Miriama le tuafafine o Mose e tulimatai le ato kome. Na gasolo ane le afafine o Farao ma lana galu teine e ta’e’ele ma latou iloa ai le ato kome o lo o faaopeaopea i totonu o vao utuutu. Na faatonuina e le afafine o Farao lana galu teine ia avane ia te ia le ato kome ma iloa ai se pepe. Na iloa lelei e le afafine o Farao o se pepe a se fafine Isaraelu, peitai ua ia manatu ina ia tausia ma ia ona ua ia alofa i le tamaitiiti.

Uiga o Upu:

- i) Pulu ti – faatumu
- ii) Ato kome – ato e lalaga i le laau o le kome
- iii) Pulu emeri – o le pulu e tutusa lelei ta lanu uliuli lea e fai ai auala e le sao ai se vai
- iv) Pulu safeta – o se pulu e fausia mai i koale (coal) po o se suauu foi.
- v) Vao utuutu – o le vao e ola i augutu po o tafatafa o se vaitafe

GALUEGA FAATINO: TALIGA FESILI

Tali Fesili nei mai le tala sa faamatalaina

1. O fea na fanau ai Mose?

Tali: O Aikupito

2. Aisea na faalafi ai Mose e lona tinā?

Tali: Nei fasiotia o ia.

3. O le a le igoa o le laau na lalagaina ai le ato?

Tali: kome

4. O ai le igoa o le tuafafine o Mose?

Tali: Miriama

5. O ai na faasaoina le ola o Mose?

Tali: Afafine o Farao

PESE:

O Mose x 2
Na nana i le ato kome
Ma tuu i le vaitafe
O Naila i Aikupito
Le afafine o Farao
Faasao i lona ola
Aua o ia e fai ma faaola. (fati: sa tatalo le teine o Hana)

A'OA'OGA:

1. Alofa atu i e manaomia le fesoasoani
2. Ofo atu galuega lelei mo isi.

FANAU MAI MOSE



BABY MOSES IS RESCUED FROM THE NILE.—EXODUS 2:1-10.

ASO SA: 21 SETEMA 2025

MATAUPU: UA FAATASIA IESU MA SAKAIO LE AO LAFOGA

SINI: Ia malamalama le vasega, o le faatasiga lea na suia ai le olaga o Sakaio.

TUSI FAITAU: Luka 19: 1 – 10

FESOASOANI MO FAIAOGA:

Faafetai i le alofa o le Atua, ua mafai ona tatou aulia mai lenei Aso Sa. A o le tatou mataupu i lenei taeao; “UA FAATASIA IESU MA SAKAIO LE AO LAFOGA.”

O le ao lafoga tamaiti, o le tagata lea e nofo i luma o le malumalu, na te aoina tupe a tagata. O le galuega lea a le toeaina lenei o Sakaio sa fai. E tutusa lava ma tagata ia e masani ona nonofo i luma o lo tatou falesa. O i latou ia latou te faamaopoopoina tupe, mo le alofa o le faifeau ma isi lava mea e tataua ona aoina ai tupe a le tatou aulotu.

Fai mai ua oo atu Iesu i Ieriko ma ui ane ai. Sa i ai le tagata lenei o Sakaio ma ua fia vaavaai o ia Iesu. O ia o se tagata puupuu sa’asa’a, a o ia foi o le telona sili po o le ao lafoga sili. O le ala lea na momo’e ai o ia ma a’e i le lauu o le sukamoru. Na iloa atu e Iesu ma fetalai atu i ai, ina ia alu ifo ia i lalo, aua e tataua ona Ia nofo i lona fale i lea lava aso. Ua fiafia tele Sakaio sa faapea ona afio atu Iesu i lona fale. Peitai ua toatele tagata na muimui ma faapea ane o Sakaio le tagata agasala, o le a faatasi atu ai Iesu i lona fale. Ioe tamaiti, o i na tautino ai Sakaio o le a ia vaeluaina atu ana mea i e matitiva. Na te tau ai foi taifa i e na tu’uaina o ia i se mea na ia ao faasili. O le suiga lea o Sakaio ma ua salamo, ua fai ai o ia ma atalii o Aperaamo auā ua faaolaina lona aiga e Iesu lea lava aso.

Uiga o Upu:

- i) telona - ao lafoga
- ii) maimoa - matamata
- iii) saasaa - pu’upu’u
- iv) muimui - tomumu
- v) sukamoru - igoa o le lauu

GALUEGA FAATINO: FAATULAGAGA O UPU

Toe tusi mai upu nei i o latou sipelaga sa’o.


- 1. Kaisao - Sakaio
- 2. Nalote - Telona
- 3. asaasa - saasaa
- 4. umiumi - muimui
- 5. Rumokasu - sukamoru
- 6. foifo - ifoifo
- 7. amomai - maimoa

PESE: Sakaio le tagata pu’upu’u sa’asa’a

A'OA'OGA:

1. Ia fai i tatou ma tagata lelei mo Iesu.
2. Lototele e tau le mea moni.
3. 'Aua le ola lē alofa.

SAKAIO LE TAGATA PU'UPU'U





ASO SA: 28 SETEMA 2025

MATAUPU: UA FAAUINA TAVITA E FAI MA TUPU

SINI: Ia malamalama le vasega, o le usitai o Tavita i le Atua na faauuina ai o ia e fai ma tupu.

TUSI FAITAU: 2 Samuelu 2: 1 – 4

FESOASOANI MO FAIAOGA:

O le a se mea ua ta'uta'ua ai lenei tagata o Tavita? Po o se mea foi na faia e Tavita tatou te manatua ai pea o ia? Ioe, Tavita lea na ia faatoilaloina pe manumalo ia Koliata le toa o Filisitia. O Tavita, o le uii lea o le fanau a le toeaina e igoa ia Iese. Sa fai o ia ma leoleo i mamoe a lona tamā i le vao. Sa ia fasia le leona ma le urosa o manu feai sa taumafai e faaleaga mamoe.

O ia o se tagata e mata'u, ma tumau i le Atua. O le taimi lea ua mavae le oti o Saulo le sa fai ma tupu ia Isaraelu, a o lo o solasola solo pea Tavita ona o le ita o Saulo ma taumafai ai e sue se auala e fasioti ai ia te ia. O le mea lea na fesiligia ai e Tavita le finagalo o le Atua ma lana faasinoga i le nuu e alu i ai. O lea na fetalai ai le ATua e alu i Heperona. Na usitai lava Tavita ma alu ane ai faatasi ma lona aiga, atoā i ma tagata sa ia te ia. O i na, na o ane ai tagata o Iuta ma feiloai ma Tavita ma ona tagata ma faauuina ai o ia e fai ma tupu ia Iuta.

Ioe tamaiti, e faaeaina i tatou e le Atua pe afai tatou te matata'u ma faamaoni ia te Ia. Na te aumaia foi le faasinoga sili mo i tatou, pe a tatou tumau i le tatalo ma fesili mo lona finagalo mo i tatou.

GALUEGA FAATINO: FAATUMUGA O AVANOA

Faatumu avanoa i upu nei mai le Tusi Paia: fesili, faapea, alu, tasi, Iuta, fetalai, Alii, Tavita, aai, mai, Heperona.

Mulimuli ane ua _____ atu Tavita i le Alii, ua _____ atu, Out e _____ ae ea i se _____ aai o _____? Ua _____ mai ai le _____ ia te ia, Ina alu ae ia. Ua fai atu _____, O le fea _____ ou te alu ae i ai? Ona fetalai _____ lea o ia, o _____.

PESE: Faauuina Tavita e fai ma tupu
Ia vivii atu ia ma faamanu
O lona tauī lea mai le Atua
Le loto maulalo
Na faatino ai o lana tautua.
Tali: Pese Osana
Pese osana
Pese osana i le tupu o tupu {fati: Aumai le suauu i lau lamepa}

A'OA'OGA:

1. E tauia i tatou e tusa ma a tatou galuega
2. E tali mai le Atua i a tatou tatalo.

FAAUUINA TAVITA E TAGATA IUTA



ASO SA: 26 OKETOPA 2025

MATAUPU: UA FAAOLAINA E IESU LE TAGATA OTI

SINI: Ia malamalama le vasega, e leai se mea e faigata ia Iesu.

TUSI FAITAU: Luka 7: 11 – 17

FESOASOANI MO FAIAOGA:

Talofa tamaiti, o le tatou mataupu i lenei taeao, “UA FAAOLAINA E IESU LE TAGATA OTI”

Leai lava se isi o i tatou ua vaai i se mea faapea. O le toe ola mai o se tagata ua oti, a ea tamaiti? O i tatou te iloa ai le matautia o tala e uiga i le tatou uo o Iesu. Fai mai le molimau a le tusi lenei o Luka. Sa i ai Iesu i le faatinoina o lana galuega, ua oo atu o Ia i le tasi aai e igoa ia Naina.

Ua latalata atu Iesu i le faitotoa o le aai, ona fetaiiai ai lea ma tagata o lo o fata mai le tagata oti. O le tama e toatasi a le fafine ua oti lana tane, o lo o tagi ma mulimuli atu i ai. Ua mutimuti le alofa o Iesu i le fafine. O lea na taofi ai tagata na fataina mai le tagata oti ma fetalai atu lea o Ia i le tama ua oti. “Le taulealea e, 89 oi 89 fai atu ia te oe, ina tulai ia. Ona nofo ai lea i luga o le tama ua tautala ona tuuina atu lea o ia i lona tinā e Iesu.

Tamaiti leai lava se mea e faigata ia Iesu. E ofoofogia mea e faia e Iesu. O lea, aua nei galo Iesu ia te i tatou aua e faia lava e Iesu mea sili 89 oi tatou pe a tatou faatuatua ma le faamaoni ia te Ia.

Uiga o Upu

i) Mutimuti – o le alofa ua naunau

GALUEGA FAATINO: MATEMATEGA

Ta’u mai po o ai tagata nei e tusa ma o latou faamatalaga.

1. Na ou ui ane i le nuu o Naina ma matou fetaii ai ma tagata o lo o fataina mai le tagata oti, ona ou faia ai lea o le vavega i lea mea. O ai la a’u?

Tali: O Iesu.

2. Na o’o muamua mai i lo’u aiga le faanoanoa ona ua oti la’u tane. Na ou toe tagi foi ona o lou faanoanoa ina ua oti atu ai ma si a’u tama tane. O ai a’u?

Tali: O le tinā.

3. Na matou mulimuli atu ia Iesu, i le nuu o Naina. Na matou fefefe ma vivii a’e i le Atua ina ua matou vaaia le ofoofogia o le mea na faia e Iesu. O ai matou?

Tali: O le motu o tagata/tagata sa molimauina le vavega.


PESE: O le Atua silisili ese.

A'OA'OGA:

1. E leai se mea e faigata ia Iesu.
2. E faia e le Atua mea sili 90 oi tatou.

FAAOLAINA E IESU LE TAGATA OTI





MANATU TAIALA O NOVEMA: E LATALATA MAI LE ATUA IA I TATOU

O le talitonuga a le au Kerisiano, e i ai le Atua i mea uma. O lona uiga, e latalata mai pea le Atua ma e i ai faatasi ma i tatou i so o se taimi. O lea foi na afio a'e Iesu i le lagi ae auina mai le Agaga Paia e fai ma fesoasoani sili mo le au faatuatua.

ASO SA: 2 NOVEMA 2025

MATAUPU: UA AGALELEI REUELU IA MOSE

SINI: Ia malamalama le vasega, o le agalelei o Reueli na tauia ai le galuega lavea'i na faia e Mose mo lana fanau.

TUSI FAITAU: Esoto 2: 18 – 21

FESOASOANI MO FAIAOGA:

O le agalelei tamaiti, e tutusa lelei lava ma le agaalofa. O se galuega lelei, po o se galuega alofa e lavea'iina pe ofoina atu ai le fesoasoani mo so o se tagata lava. Fai mai, ua sola ese mai Mose mai Aikupito ona ua fia fasioti Farao ia te ia. Ua alu atu o ia ma nofo i luga o le vaieli i le nuu o Mitiana. Ua oo i le isi taeao, ona o ane lea o afafine o le tasi ositaulaga i Mitiana e utu vai e faainu ai a latou mamoe. Peitai, ua o ane leoleo mamoe ma tutuli ia te i latou, ona tulai ai lea o Mose ma lavea'i ia i latou ma faainu i a latou lafu mamoe.

Ua ao atu afafine o le ositaulaga ma ta'u ai ia Reuelu po o Ietero lo latou tama, mea uma na faia e Mose ma lavea'iina ai i latou. Ona faatonuina ai lea e Reuelu ona afafine ina ia valaauina Mose e nofo i lo latou fale ma avane i ai meaa. Ua le gata i lea, a ua avatu ai foi lona afafine o Sepora e fai ma avā a Mose. Ese le lelei o lenei tama o Reuelu a tamaiti, ua tau ai le galuega alofa a Mose na fai i lana fanau i lona agalelei atu ia te ia. E ui na te lei iloaina lenei tagata.

Tamaiti, ia tatou agalelei atu i so o se tasi. Tusa lava pe tatou te masani pe le masani, ia tatou alolofa ma fesoasoani atu ia i latou.

GALUEGA FAATINO: TALIGA FESILI

Tali fesili nei mai le tala sa faamatalaina.

1. O fea na nofo ai Mose ina ua sola ese mai Aikupito?

Tali: Sa nofo i luga o le vaieli o Mitiana.

2. O le a le galuega sa faia e afafine o Reuelu?

Tali: Sa leoleo i a latou mamoe.

3. O le a le galuega lelei sa faia e Mose mo afafine o Reuelu?

Tali: Tutuli ese isi leoleo mamoe ae faainu i a latou mamoe.

4. O fea le nuu sa nonofo ai Reuelu ma lona aiga?

Tali: Mitiana

5. O le a le tau'i na faia e Reuelu mo Mose?

Tali: Nofo i lona aiga, fafaga ia te ia ma avane i ai lona afafine o Sepora e fai ma ana ava.

PESE: Le alofa o le Atua pei o se lio tele
E taamilo lava leai se mutaaga
Le alofa o le Atua
E fai pea e le gata
Ua alofa mai o Ia, i aso uma lava.

A'OA'OGA:

1. Ia agalelei atu i so o se tagata.
2. Ia manatua le alofa o so o se tasi mo i tatou.

MOSE I LE FALE O REUELU/IETERO





ASO SA: 9 NOVEMA 2025

MATAUPU: UA FAAOSOOSINA IESU E SATANI

SINI: Ia malamalama le vasega, na faaosoosoina Iesu e satani, ae lei usitai i ai Iesu.

TUSI FAITAU: Luka 4: 9 – 13

FESOASOANI MO FAIAOGA:

O le faaosoosoina tamaiti, e sau mai le upu faaosooso. O le galuega tele lea a satani po o le tiapolo o lo o faia i lenei lalolagi. Na te faaosoosoina pe uuna’i i tagata ina ia latou faia le leaga ma amio e agasala ai i luma o le Atua. A o le taimi lava e faaosoosoina ai i tatou e satani, o le taimi foi lea o lo o tofotofoina ai i tatou e le Atua pe mafai ona tatou tumau i le amio lelei ma fiafia mai ai o Ia ia te i tatou.

Ina ua uma ona papatisoina o Iesu ona ave loa lea e le Agaga o le Atua i le vao e faaosoosoina ai o Ia e le tiapolo po o satani. E tolu faaosoosoga na faaosoosoina ai e Satani ia Iesu. Peitai, o le faaosoosoga lona tolu po o le faaosoosoga mulimuli lea i le molimau a Luka, lea e faatatau i ai le tatou mataupu i lenei taeao. Fai mai ua ave e le tiapolo Iesu i Ierusalem ma faatu i le tumutumu o le malumalu, ona fai ane lea ia te Ia, “Afai o Ia o le Alo le Atua, ina oso ia oe i lalo i le mea nei; auā ua tuisa, E poloai le Atua i ana agelu ia te oe, e tausii ia te oe; latou te ave ia te oe i o latou lima, nei tu’ia lou vae i se maa.” Na tali i ai Iesu ma faapea atu; “O lo o faapea le upu, ‘Aua e te tofotofoto i le Alii lou Atua.’”

Ioe, tamaiti, ia tatou tumau i le amio lelei, ae aua nei o tatou faia le amio leaga e le fiafia mai ai Iesu ia i tatou. Aua foi nei avea i tatou ma tagata e tau faaosooso i isi tamaiti e fai ni amio leaga.

Uiga o Upu:

- i) malumalu - falesa
- ii) poloai - faatonu
- iii) tofotofoto - faafiaula/ulagia le Atua
- iv) tiapolo - satani
- v) faaosoosoga - uuna’ia pe tulei le isi tagata e fai le amio leaga

GALUEGA FAATINO: TUSIGA SA’O O UPU

Faatulaga mai upu nei i o latou sipelaga sa’o

- 1. mutumutu - tumutumu
- 2. lumaluma - malumalu
- 3. atufa - faatu
- 4. poailo - poloai
- 5. eluga - agelu
- 6. tipoloa - tiapolo
- 7. fotofoto - tofotofoto


PESE: Tulei ese, tulesi ese

A'OA'OGA:

1. Ia malo le lelei ia i tatou.
2. Tete'e atu i le fili.

IESU I LUGA O LE MALUMALU





ASO SA: 16 NOVEMA 2025

MATAUPU: UA FAASAOINA Tanielu e le Atua.

SINI: Ia malamalama le vasega, o le Atua na pupuniina gutu o leona ma faasaoina ai le ola o Tanielu.

TUSI FAITAU: Tanielu 6: 18 – 24

FESOASOANI MO FAIAOGA:

O Tanielu tamaiti, o le tagata e tumau i le Atua. O se tagata foi sa faamanuia i ai le Atua ona o lona lotomau ia te Ia. O se tagata atamai tele i le faamatalaina o miti ma tupua sa le mafai ona faamatalaina e nisi.

O miti ma tupua a Nepukanesa, na faamatala uma lava e Tanielu o latou uiga. O le ala lea ua tofia ai o ia e fai ma alii silisili i le malo. Peitai, ua saili e nisi alii sili o le malo se mea e fasiotia ai o ia. Na latou fai atu i le tupu ia faia se tulafono, ia le toe tatalaina e pei o tulafono a Metai ma Peresia. Na latou faia lea o le tulafono ina ia tau lava o le tupu e faatoga ma ifo uma i ai tagata. Ua latou iloa Tanielu e ta'i faatolu ona ifo o ia ma tatalo i le Atua. Na latou molia o ia i le tupu ma fai ai le faaiuga e tusa ma le tulafono, ina ia lafoina o ia i le lua o leona. Na latou lafo ia Tanielu i le lua o leona, ona faapea ane lea o le tupu ia Tanielu, o lou Atua, o le ua e auauna i ai e le aunoa, na te lavea'iina oe.

Na tulai le tupu i le vaveao ma alu atu i le lua o leona ma valaau ia Tanielu, pe na mafai ona lavea'iina o ia e lona Atua. Na tali mai Tanielu, na auina mai e le Atua ana agelu ma punitia gutu o leona. Na aveina ae Tanielu mai le lua e lei afaina o ia. Na fiafia le tupu ona o Tanielu. Ona avane ai lea o i latou na molia Tanielu ma lafo i le lua o leona ma lamu palaina ai lea o latou ivi e leona.

Uiga o Upu:

- i) lolofi - tumutumu (toatele) o tagata
- ii) faamauiina - faailogaina
- iii) lavea'iina - faasaoina
- iv) faataalise - faavavevave
- v) faamamai - tau le lagona le leo

GALUEGA FAATINO: SIPELAINA O UPU (SPELLING TEST)

Tusi mai upu nei o le a tauina atu i lona sipelaga sa'o. (Ia saunia pepa mo tamaiti e lau susuga i le faiaoga mo lea galuega, ia ta'u pe lau atu e lau susuga i le faiaoga upu ae tusi mai e tamaiti i pepa ua saunia)

- 1. Tanielu
- 2. Silisili
- 3. faalogo
- 4. tupu
- 5. lavea'i
- 6. auauna
- 7. leona
- 8. Tulafono
- 9. faavavau
- 10. Faataalise

PESE: Ia pei o Tanielu
Le na loto mau
Aua na le auai ia
I mea le tatau

A'OA'OGA:

1. E le tuulafoa'iina i tatou e le Atua.
2. Tumau i le tatalo pei o Tanielu
3. Aua le ola taufaaleaga

FAASAOINA TANIELU E LE ATUA



ASO SA: 23 NOVEMA 2025

MATAUPU: UA TOFA IESU I LUGA O LE VAA

SINI: Ia malamalama le vasega, na tofa Iesu i le vaa a o agi le matagi malosi na fefefe ai le au so'o.

TUSI FAITAU: Mataio 8: 23 – 27

FESOASOANI MO FAIAOGA:

O le tofā tamaiti, o le upu fa'aaloalo o le moe. E mafai ona tatou faapea, Ua tofā po ua moe Iesu i luga o le vaa. Fai mai a o faagasolo pea le galuega a Iesu ma ona so'o. Na maliu ane ai Iesu i le vaa, ona mulimuli atu ai lea ia te Ia o ona so'o.

A o i ai, i latou i luga o le vaa e agai atu i le isi itu vai. Na osofia ai lo latou vaa e peau ona o le afa tele na agi. A o Iesu, ua tofā o Ia i luga o le va'a. Sa fefefe le au so'o ona o le sou o peau ma le afa tele. O lea na latou fafagu ai iā Iesu ina ia faaola ia i latou. Ua fetalai ane Iesu ia i latou pe aisea lava ua latou matatau ai, o i latou o tagata faatuatua itiiti. Na mafua ona fetalai faapea Iesu i ona so'o tamaiti, ona ua latou le iloa Iesu o lo o latou malaga faatasi. O lea na Ia tulai ai mamao vavao i le matagi ma le vai ona tele ai lea o le malu. Ua taufaiofo ai foi i latou ona ua usiusitai le matagi ma le vai ia Iesu.

Ioe, tamaiti o le vavega na faia e Iesu i le matagi ma le vai, ua iloa ai e leai se mea e faigata ia Iesu. So o se mea foi e i ai Iesu, tatou te maua ai lona filemu.

GALUEGA FAATINO: PASO (Puzzle)

Saili mai upu nei i totonu o le paso o lo o i lalo

UPU:	tofa	fetalai
	Iesu	matata'u
	Luga	taufaiofo
	Vaa	matagi
	Fafagu	vavega

T	U	M	A	T	A	T	A	U
F	A	F	A	G	U	R	I	M
A	L	U	T	O	V	A	A	I
U	A	T	F	U	A	R	L	T
I	E	S	U	A	L	G	A	O
M	A	T	A	G	I	U	T	F
O	N	A	M	U	T	O	E	A
L	K	A	U	L	E	I	F	G
V	A	V	E	G	A	O	L	O

PESE: A i ai Iesu i lo'u va'a, ou te ata i le afa.

A'OA'OGA:

1. E usitai mea uma i le Atua
2. Aua le fefe vale
3. Tumau i le faatuatua.

TOFA IESU I LUGA O LE VAA





Jesus Calms the Storm

ASO SA: 30 NOVEMA 2025

MATAUPU: UA FAALELEI ESAU MA IAKOPO

SINI: Ia malamalama le vasega, na faalelei Esau ma Iakopo ina ia maua lo laua fealofani.

TUSI FAITAU: Kenese 33: 1 – 4

FESOASOANI MO FAIAOGA:

O Esau ma Iakopo, o le fanau lea a le toeaina o Isaako. O lona uiga, o tama ia o le auuso. Peitai, na feeseesea'i i laua ina ua faoa e Iakopo le tama laitiiti le tofi o le ulumatua mai ia Esau le tama matua. Na faoa foi e Iakopo manuia mai lo laua tamā o Isaako i le togafiti na faia e Repeka lo la'ua tinā. O le mafuaaga lea na alu ese ai Iakopo ma ua ita tele Esau ma manatu ai na te fasioti ia Iakopo. Ua tele aso ma tausaga na valavala ai le auuso lenei. Ua tupu foi le aiga o Iakopo, ona manatu ai lea o ia ina ia alu atu i lona uso o Esau. Ua alu le malaga a Iakopo faatasi ma ana ava (toalua) ma ana auauna fafine ma a latou fanau. Ua ave foi meaalofa ma Esau ina ia fiafia mai ai o ia i lona uso o Iakopo.

Peitai tamaiti, i le taimi na fetai ai Esau ma Iakopo, ma iloa atu e Iakopo ia Esau ua o mai ma tagata e toafa selau. Ua ia vavae atu ana fanau ia Lea, ma Rasela ma auauna fafine e muamua atu ia te ia. Ua ia ifo toele foi faafitu ina ua latalata atu i lona uso o Esau. E lei toe faatali le tama o Esau, a ua momo'e atu e faafetaiai i lona uso o Iakopo, ua fusi ia te ia ma punou i lona ua. Uafeasogi ma ia, ona la fetagisi ai lea. Ua toe lelei le auuso lenei ina ua fefaamagaloa'i ma toe maua ai lo laua fealofani.

GALULEGA FAATINO: FAATUMU AVANOA

Faatumu avanoa i upu ua saunia e pei ona aumai i le Tusi Faitau. **Upu:** tepa, Iakopo, Faauta, tagata, selau, vavae, fanau, Lea, Rasela, fafine.

Ua ___1___ a'e ___2___ ua iloa atu, ___3___ foi, o ___4___ ua sau ma ___5___ e toafa ___6___ ma ia. Ona ___7___ atu lea e ia o le ___8___ ia ___9___ ma ___10___, ma auauna ___11___ e toalua.

PESE: O le auuso ua faalelei
O Esau ma Iakopo
Ina ua mavae tausaga e tele
E lei mafai ona o le fefe
Ua feiloai i loimata
Pepese ma alalaga
O le finagalo lea
O le Atua
Ua faataunuaina } x 2
(fati: O le nofoaafi o le Tala Lelei)

A'OA'OGA:

1. Ia maua le loto faamagalo
2. Ia tatou fealofani
3. Ia tatou faatupuina le filemu

ESAU MA IAKOPO





SI-Takla.org

MANATU TAIALA O TESEMA: IA OLA TALITONU I LE ATUA

O le ola talitonu, o lo tatou taliaina lea ma le loto atoatoa o le Atua ma ana faiga, e taitaiina ai le soifua ma lo tatou ola, a o tatou folau ai i lenei folauga. O le tatou faatuatua lava lea ma faalagolago atu ia te ia, e manuia ai mea uma tatou te faia.

ASO SA: 7 TESEMA 2025

MATAUPU: UA GŪGŪ SAKARIA

SINI: Ia malamalama le vasega, o le gugū ai o Sakaria, ona ua le talitonu i le feau mai le Atua.

TUSI FAITAU: Luka 1: 18 – 25

FESOASOANI MO FAIAOGA:

O Sakaria tamaiti, o ia o se tasi o faitaulaga po o le ositaulaga sa i ai i le nuu lenei o Iutaia. O lana galuega lenei sa auauna ai i le Atua. O ia na te faia taulaga i le Atua i totonu o le malumalu.

O se tasi aso na alu ai Sakaria e osi le taulaga i le malumalu, ae fa'aali ane ai ia te ia Kaperielu le agelu a le Atua. Na ia faailoa ia Sakaria le feau mai le Atua; o le a to lana avā o Elisapeta ma na fanaua se tama tane. Peitai, sa le talitonu le toeaina o Sakaria auā ua loomatua lona toalua o Elisapeta, ua toeaina foi o ia. O lea na faapea ane i le agelu; na auina mai o ia e le Atua e ta'u atu ia te ia lenei tala lelei. Faauta foi, e gūgū o ia ma lē magagana seia oo i le aso e faataunuaina ai e le Atua lenei mea, auā ua ia le talitonu i upu a Kaperielu le agelu. Na faateia tagata sa faatalitali i fafo o le malumalu, ina ua ulufafo Sakaria ua lē maugagana a ua genogeno atu ia te i latou.

Tamaiti, a fa'aauau le tala, i le fuaiupu e 63, na faatoa toe tautala ai Sakaria, ina ua ia faaigoaina lona atalii ia Ioane.

Uiga o Upu:

- i) Kaperielu - igoa o le agelu a le Atua.
- ii) genogeno - gagana a le tagata gūgū fa'aaogaina ai mata
- iii) lē magagana - lē tautala
- iv) malumalu - falesa

GALUEGA FAATINO: MATEMATEGA

Ta'u mai po o ai e faatatau i ai faamatalaga nei. (E fautuaina lau susuga i le faiaoga, e manaia foi pe a lauina/faitauina e lau susuga faamatalaga ae ta'u mai e tamaiti po o ai e faatatau i ai)

1. O a'u o se auauna, ou te tautua ma le faamaoni mo lo'u matai. O au o se ave feau e ta'u atu le finagalo paia o lo'u matai i le lagi. O ai a'u?

Tali: O Kaperielu

2. Na fausia a'u e tagata mo se faamoemoe taua tele. E potopoto mai ai tagata e toatele ma faatasi ai, ma pepese ma vivii, ma folafola ai a'fioga paia a le Atua. E le tatau pisapisao, ta'a'alo, pe ulavavale ai tamaiti, aua e manaomia le filemu. O ai a'u?

Tali: O le Malumalu

3. O a'u o le ositaulaga, na oo mai le a'fioga a le Atua ua matutua i maua ma lo'u toalua. O le ala lea na ou le talitonu, peitai ua oo mai le gūgū ia te a'u ma lē mafai ai ona ou taulala. O ai a'u?

Tali: O Sakaria

PESE:


Kaperielu le agelu
Auina mai e le tupu
Faailoa o le feau
Aua e taunuu

Peitai, ua talia gata
E Sakaria ua toeaina
Faafea o lana ava
Aue ua le tautalā.

A'OA'OGA:

1. E le lelei le ola le talitonu i le Atua.
2. E taunuu manuia mea uma ona o le Atua.

SAKARIA I LE MALUMALU



ASO SA: 14 TESEMA 2025

MATAUPU: UA FA'AALI LE AGELU IA IOSEFA

SINI: Ia malamalama le vasega, o le fa'aali o le agelu ia Iosefa, o lona faailoa atu lea o le feau mai i le Atua.

TUSI FAITAU: Mataio 1: 20 – 25

FESOASOANI MO FAIAOGA:

O ai foi Iosefa tamaiti? Ioe, o Iosefa le tamā o Iesu. O ia o se tagata e poto e fau fale ie, ia po o ia foi o se kamuta.

A o lei fanau mai Iesu,, sa fa'aali muamua le agelu ia Maria le tinā o Iesu, o le a to o ia ma fanau mai se tama tane, ma na faailoa ai foi, 108 ate aumai le tagata lenei o Iosefa e fai ma ona toalua.

Ua uma ona fa'aali o le agelu ia Maria, ona fa'aali ai lea o le agelu ia Iosefa i le miti. Na te aumai ia te ia Maria lana avā, auā o lana to e mai le Agaga Paia. Na te fanauina se tama tane, 108 ate faaigoa foi ia te Ia o Iesu, auā e faaola e Ia lona nuu mai a latou agasala. E faataunuuna ai foi valoaga a le perofeta, e to le taupou ma ia fanauina se tama tane ma faaigoa ia te ia o Emanuelu, o lona uiga; Ua ia te i tatou le Atua. Na ala Iosefa mai lana miti, ma ua faataunuuna mea uma e tusa ma le feau na faailoa mai e le agelu. O lona usitaia lava lea o le finagalo o le Atua.

GALUEGA FAATINO: PASO

Saili mai upu nei:

- | | |
|---------------|--------------|
| 1. IOSEFA | 7. IESU |
| 2. MANATUNATU | 8. FAAIGOA |
| 3. FAAALI | 9. TAUNUU |
| 4. AGELU | 10. AFIOGA |
| 5. AGAGA PAIA | 11. ULUMATUA |
| 6. EMANUELU | 12. FANAU |

A	G	A	G	A	P	A	I	A	U
G	M	I	O	S	E	F	A	T	L
E	F	A	A	I	G	O	A	A	E
L	E	A	T	K	R	N	U	F	U
T	A	U	N	U	U	I	T	I	N
A	P	L	S	T	O	E	A	O	A
I	S	E	A	K	U	N	M	G	M
M	I	N	A	G	E	L	U	A	E
I	A	L	F	A	A	A	L	I	R
M	O	E	F	A	N	A	U	K	U

PESE: O leoleo mamoe, na leoleo po (pese kerisimasi)

A'OA'OGA:

1. Ia tatou maua le loto maulalo
2. Toaga e faitau i Afioga Paia a le Atua.

IOSEFA MA LE AGELU

